

Redzuun Rexpejn Dios

Siääd Sprit Dxan xten Dios te cuääzni neṅ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist näjza nani baluüi Jesucrist, che guslojlini,

² hasta dxejli ni huäjsni xhaguibaa. Gunibexgaani xhini'c gun renani guleni gac xpejnṅpacni. Sprit Dxan xten Dios baluüi Jesucrist xhi guiniini lojreni.

³ Gudejd Jesucrist trabajwduxh, dxejcti gujtni. Dxejc gubaṅsacni lo rebēṅgut, baluilojni lo rexpejnṅpacni. Tiuu dxej baluilojni loj rexpejnṅpacni balti huält te gacbeereni agubaṅsacni. Guniizani lojreni xcuent xcälṅnibee Dios.

⁴ Che gudejd tiuu dxejga, batojp Jesucrist rexpejnṅpacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjṅpni:

—Dee abiejn diajgtu guniä lojtu.

⁵ Juan batiobnis con nis, luxh ṅaj guxii dxej cayäädx dxejcru siääd Sprit Dxan xten Dios te cuääzni neṅ lastootu. Si'c guirobnistu —räjṅpni.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La ṅaj gudedsaclu yälṅnibee lo rexpejn Israel, ä?

⁷ Dxejcti räjṅp Jesucrist loj rexpejnṅpacni:

—Di riäjł gacheetu xcuent redxej nājza retiemp nani abasobxгаа Dios con xcäl̄rnibeeni.

⁸ La'tu sica'tu yäl̄rnibee che abiääd Sprit Dxañ xten Dios neñ lastootu. Dxejc chatie'chtu xtidxä nājza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, nājza neñ guideb guedxliuj —räjpni.

⁹ Gulujxtis gunii Jesucrist rediidxga, luxh lałni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni neñ zaga. Ro'cti diru rebejn nuhuii lojni.

¹⁰ Lałni cadxelodxi rebejn xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni.

¹¹ Dxejc räjp reangl loj rebejn:

—¿Xhi rajctu beñ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpreni.

Gulereni Matías ni najc apostcoob

¹² Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajç sarenı dxej ni rusilajzreni.

¹³ Che biu'reni Jerusalén, bidzujñreni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr nājza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, nājza Judas bejtz Jacob.

¹⁴ Ro'c yu' guiraareni nājza regunaa nājza Marii xnan Jesucrist nājza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

15 Nadxagsa' te gayuu gajl bejn. Dxejcti huisulii Pedr galäiireni, räjpni loj rebejn:

16 —Caniä lojtu, resa'ä, nanabpac soob xtidx Sprit Dxaan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni.

17 Gujc Judas sa'nu, bejnzani lagajc dzuun ni biennu.

18 Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnni, badesacni meel lojreni. Gusiireni te la' yuj. Dxejcti lagajc Judas basäl duu guejnni, guzäbnajlni lo bej, gujtni. Gusaguijni, dxejcti biräjs xque'ni birii guiraa reziini.

19 Che biejn diajg rebejn Jerusalén si'c, gulälajreni yujre Acéldama, ni säloj yurejn.

20 Nen guijtz ni laa Salmos abacuaa toDavid rediidxre:

Sujianxteb rolijzni;

na'c cuääzru bejn rolijzni;

näjza:

Suxca'za ste'ca niguii xtzuunni.

21 Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni gyunäj Jesucrist nuunu,

22 dxejli ni gusloj batiobnis Juan hasta dxej ni huäjs Jesucrist xhaguibaa. Te gacnä j niguiire nuunu gusule'nu diidx gubansacpac Jesucrist lo reben gut.

23 Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías.

24 Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire,

²⁵ te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapost te gujcreni tzubitio'p apost.

2

Biääd Sprit Dxaan xten Dios

¹ Che bidzujñ dxej ni rajc lanij xten Pentecostés, tre' guiraareni tejsi lajt neñ te yu',

² chela gusloj cayubej xhaguibaa si'c te beroduxh, bachajni guideb neñ yu' cadro suga'reni.

³ Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c.

⁴ Biu'ti Sprit Dxaan xten Dios neñ lastoo guiragajceni. Dxejc gusloj caniireni garen-garen didxsaj si'ctisni badeed Sprit Dxaan xten Dios guiniireni.

⁵ Neñ redxejga, xhidajl rexpejn Israel ni sasanäjpac xtidx Dios bidzujñ guedx Jerusalén. Xhidajl lajt biriireni siädreni.

⁶ Che biejn diajgreni guyubej beduxhga, bidojp reben xhidaalga, bachaag sa'reni. Rdxeloduxh reben xhidalga sa'csi cayejn diajgreni canii reapost xtidxsajpac cade tejreni.

⁷ Cadxelojreni räjpreni:

—¡Bahuilaa! ¿La et ben Galileedi renani canii, ä?

⁸ ¿Xhoxh riejn diajgnu caniireni xtiidxpacnu si'ctis ni rniinu laadxnu, ä?

⁹ Najcnu beṇ nacióṇ Partia, beṇ nacióṇ Media, beṇ región Elam, beṇ Mesopotamia, beṇ Judea, beṇ estad Capadocia, beṇ región Ponto, nájza beṇ Asia.

¹⁰ Najczanu beṇ distrit Frigia, beṇ estad Panfilia, beṇ nacióṇ Egipto, nájza bejṇ ni siäd stelaad Cirene, te estad neṇ Africa. Loj rebejṇ ni siäd Roma yu' reni najc xpejṇ Israel, yu'za reni bazuxhijb lo Dios sa'csi rililajzreni si'cni rililajz rexpejṇ Israel.

¹¹ Yu'za beṇ Creta. Yu'za beṇ nacióṇ Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujṇ Dios.

¹² Bidxeloduxh rebeṇ xhidaalga, dijiejṇ xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebejṇ ni baxhiznäjreni, räjpreni: —Agusojz redee.

Gunii Pedr loj rebejṇ

¹⁴ Dxejcti gusulii Pedr nájza tzubiteeb sa'ni, guredxa'ni guniini lo rebeṇ xhidaalga:

—Guejbtu, rexpejṇ Israel, nani rbäjz distrit Judea nájza guedx Jerusalén. Colcuadiajg diidx nani guiniä.

¹⁵ Xhet sojzdinu si'cni cayujntu xhigab. Rsilru naj, entis gojl rcagaa.

¹⁶ Dxejc scree gunii Joel che guniini xtidx Dios agujc xchero.

¹⁷ Räjpreni Dios:

Sidzujṇ dxej che guxhalä Xsprit Dxañä cuääzni neṇ lastoo guiraa rebejṇ.

Rexingaantu näjza rexindxa'ptu sinii xtidxä
xcuent recos ni gajd gac.

Rexi'ntu sinixcal,
rextadgoldootu suluiloj bacal recos nani guluiä
lojreni.

¹⁸ Guxhalä Xsprit Dxanä loj guiraa reni siädnajl
narä.

Siniireni rediidx ni gudedä lojreni xcuent recos
nani gajd gac.

¹⁹ Suluiä lojtu balti senro xhaguibaa näjza lo
guedxliuj.

Resenro ni gac najc rejn con guiboo, luxh guxh
sire' si'c te za.

²⁰ Sicäy loj gubijdx, sajc bäii si'c rejn.

Sajc guiraa recosre,
dxejcru sidzujñ dxeduxh che jiälsacä narä, Dios.

²¹ Dxejc guiraa rebejn nani cueedx guiniab gacnäj
Diosreni, reni'c siliaa lo dojl.

²² Räjpedr lojreni:

—Rexpejn Israel, colcuadiajg xtidxä. Dios baluii
Jesucrist, ben Nazare't, lojtu por recosro, remi-
lagwr, reseen nani bejnne nez lojtu. Lagajc Dios
badeed yälrnibee loj Jesucrist te bejnne redzun-
roga. La'tu nancheetu dee.

²³ Galooli ananchee Dios xhi guntu loj Jesucrist
Xi'nni. Basaanza Dios bateedtu Jesucrist ladznäa
rebeñguijdx te bacuaareni Jesucrist lo cruzj te
bagu'trenini.

²⁴ Baspañsac Dios Jesucrist, basläa Diosni
ladznäa yälgujt, sa'csi di niajcdi nica' yälgujtni
par tejpas, sa'csi laani rnibee lo yälgujt.

²⁵ Che gubaṅsac Jesucrist, guzojb diidx ni bacuaa David lo guijtzc xcuent Jesucrist. Rājpc David lo Dios:

Guira dxej ruhuiä lojlu, Dios.

Suga'lu xladbeä cayacnäjluc narä te di guidxejbc lastoä.

²⁶ Ni'cni bibalajzc lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neṅ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibaṅä par tejpas.

Sibalazduxhä sa'csi guibaṅnää luj, si'c rājpc David xcuent Jesucrist.

²⁹ Rājpc Pedr:

—Guyasi guiniä lojtu agujc xchero gujtc David. Aguyutzuc'tzni neṅ baa. Sajc guihuiinu baa cadro biga'tz David.

³⁰ Gunii David xtidx Dios. Che nabajṅli David bia'n diidx gudeed Dios te xajgni ni guirilaj Crist, luxh laani gacni rei si'cni gujtc David.

³¹ Sa'csi baluixgaa Dios recosre lo David, ni'c rājpc David sibaṅsac Crist lo rebengut sa'csi di Dios gusaan jia'n xaimni neṅ baa, dizani gusaan gudx tiejxhni.

³² Guläs Dios Jesucrist lo rebengut. Nuure bahuiloonuni, najcnu testiigw gubaṅsacni lo rebengut.

³³ Gurejdx Dios Jesucrist. Naj nabajṅ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo

guedxliuj. Jesucrist cayujn guira'ti nani cahuiitu, nani cayejn diajgtu nadxej.

³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä

³⁵ che guidzujnli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶ 'Rniliäpac lojtu —räjp Pedr—. La'tu bacuaatu Jesús lo crujz. Ni'cni, colgacbee, guiraatu xpen Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo crujz, guc-huinuxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlanjztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz nen lastootu.

³⁹ Si'c rlanjz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

⁴⁰ Dxejcru gunii Pedr xhidajlru diidx, baliidxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ mil bejn.

⁴² Sanuutis rusoobreni diidx ni baluui reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

Xho gubajn rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr.

⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni.

⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni.

⁴⁶ Guixe-guixee bidojpreni nen guidoro xten Israel. Tejsi najc rexhigabreni. Gudaunäj sa'reni rolizj cadetejreni, guiraareni bibalaznădUXH sa'reni.

⁴⁷ Gulă'preni xpala'n Dios. Guiraa rebejn gunii rexpejn Jesucrist najc beŋsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

3

Biajc niguii nani racxhoo ni'ni

¹ Guyu' te dxej sää Pedr năjza Juan nez loj guidoro si'cti rcachon gudxej.

² Guyu' te niguii nani racxhoo ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacrú. Ro'c rbejni rniabni gojn lojreni riu' guidoo.

³ Che bahuiini agojl jiu' Pedr năjza Juan nen guidoroga, gunabni te gojn lojreni.

⁴ Dxejcti bahuii Pedr näjza Juan lojni. Räj̄p Pedr lojni:

—¡Bahuii loonu!

⁵ Che biejn diajg niguiiga xtid̄x Pedr, bahuiini lojreni sa'csi naani sudeedreni meel lojni.

⁶ Räj̄p Pedr lojni:

—Xhetliidi meeldi rapä, nani rapätis sunid̄xä lojlu. Xcuent xcäl̄rnibee Jesucrist, beñ Nazare't, rniä lojlu: ¡Gusulii! ¡Gusaj! —räj̄pni.

⁷ Dxejcti gunaaz Pedr ñaani, guläs̄nini. Biligajc ni'ni, gusutijp ni'ni.

⁸ Huisuyäl̄ni, gusajni. Biunäj̄ni Pedr näjza Juan neñ guidoro. Rsiajni, rtiäs̄ni, calä'pni xpala'n Dios.

⁹ Bahuii xhidajl beñ lojni neñ guidoro, rsiajni, calä'pzani xpala'n Dios.

¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxelo-duxhrenei bahuiireni xhi gusajc niguii ni gucxhuu ni'ni.

Baluii Pedr xtid̄x Dios neñ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga ñaareni. Ruxuñ guiraa rebejñ bidzujñ neñ cordoorga. Bidxelojreni sa'csi arsiaj niguii ni gucxhuu ni'ni.

¹² Che bahuii Pedr lo rebejñ räj̄pni lojreni:

—¿Xhicuent rdxeloy guejbtu, rexpeljñ Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcäl̄rnibee Jesucrist biajc ni' niguiire.

13 Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yäl̄rnibee loj Xi'nni Jesús. Niluxh la'tu bateedtuni ladz̄naa reguxhtis. Che r̄lajz Pila't ni rnibee nus̄laa Jesucrist, ditu nicäjb niriini, alga guniyajtuni nez loj Pila't.

14 Niluxh la'tu baṛo'ntu Xi'n Dxi xten Dios nani rujn ganax dzunsa'c. Alga gunabtu birii te niguii nani bagu't bejn.

15 Jesucrist rudeed yäl̄nabajn, luxh la'tu gunabtu bacuaareni Jesucrist lo cruzj. Gulässac Dios Jesucrist lo reben̄gut. Bahuiloonu nabajn Jesucrist, najcnu testiigw gubansac Jesucrist lo reben̄gut.

16 Cahuiitu loj niguiire nani gucxhuu ni'ni, luxh rumbeetuni. Xcäl̄rnibee Jesucrist abasiajz niguiire, sa'csi huililajzni. Sa'csi huililajznu xtidx Jesucrist, ni'c b̄iajzni te najcni si'cni rhuiituni naj.

17 'Rexpejn Israel, narä nanä di'tu niacbee, diza rexcuxhtistu niacbee laa Xinxan xten Dios ni bacuaatu lo cruzj.

18 Scree gujc te guzojb xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh.

19 Ni'cni col̄siechlajztu, col̄guibi' loj Dios te guibicaj xtojltu. Dxejc susiälyuj Dios lastootu, sujnni gac nacoob guira'ti, si'cni b̄ia'n diidx gacni.

20 Lojtu suxhalza Dios Jesucrist nani rnibee, nani aguleni galooli.

21 Naj nungäj̄l jia'n Jesucrist xhaguibaa dxejli guscoob Dios guiralii recos si'cni b̄ia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero.

²² Scree gunii toMoisés lo retoxtadgoldoonu, räjpni: “Xtadnu Dios suxhal te niguui sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu.

²³ Renani di gusoob rextiidxni, sinitlojreni, direni gac rexpejn Dios.”

²⁴ Räjpa Pedr:

—Sigajcza agunii guiralii reniguui nani gunii xtidx Dios. Si'c agunixгаа toSamuel, näjza guiraa reniguui ni siädnaļni, xcuent recos ni cayajc neņ redxejre.

²⁵ La'tu najc xajg reniguui ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiaļ te xajglu ni guspalazduxh rebeņ guedxliuj, sa'csi suslaanireni lo doļ.”

²⁶ Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu doļ —räjp Pedr.

4

Balui Pedr näj Juan xtidx Dios loj reguxhtis

¹ Laļ ni caniireni lo rebejn, ro'c bidzujn rebixhojz xten Israel näjza nani rnibee lo resoldaad xten guidoro näjza resaduceos.

² Bidxe'chduxhrene sa'csi cagulijdxrene rebejn, cayäjpreni:

—Sibaņsac rebejn lo rebeņgut sa'csi gubaņsac Jesucrist lo rebeņgut.

³ Gunaaz reguxhtisrene, biäureni sa'csi agudxej luxh abiäu jusgaad. Neņ latzguiib barareni yääl.

⁴ Xhidajl reni biejn diajg xtiidxreni huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebengool, renani rnibee guedx Jerusalén, näjza rebejn ni ruluii leii,

⁶ näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee.

⁷ Gunibeereni biääd Pedr näjza Juan gusuj galäiireni te gunabdiidxreni lojreni:

—¿Chu xcälrnibee rajptu? ¿Chu laj basä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxaan xten Dios nen lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel,

⁹ palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basi-ajcnu niguiiga,

¹⁰ gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yälrnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruujz, niluxh Dios guläsni lo rebengut.

¹¹ Di'tu ninälajz xtidx Jesucrist. Laani najc si'c te guij nani rbäcajtu che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'.

¹² Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c räjp Pedr.

¹³ Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guitujy. Dxejcti räjp rebixhojz ni sajcru lo sa'reni:

—Direni ganduxh guijt, bejn̄tisreni.

Dxejcti gucbeereni gusanäj redee Jesucrist, lojni bisieedreni.

¹⁴ Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni.

¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni.

¹⁶ Räjpreni lo sa'reni:

—¿Xhi jiennänu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaznuni.

¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcru guicuaadi-aagnu? ¿Xtiidx la'tu, o xtiidx Dios?

²⁰ Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn̄ bejnreni te

dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c.

²² Sa'csi niguii ni basiajcreni xcuent yälmilagwr agudejdni tiuu ijz.

Guredx-gunab rexpejn Jesucrist lo Dios

²³ Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza reben̄gool lojreni.

²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa näjza guedxliuj näjza nisdoo näjza guira'ti ni yu' lojreni, nen̄reni,

²⁵ nani bejn basoob toDavid xtidx Sprit Dxa te bacuaani xtiidxlu, räjpni:

¿Xhicuent guyuduxh reben̄ guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhal̄ Dios, si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza reben̄zijt nani di gac xpejn Israel. Bidxechnäjreni Xi'nlu nani najc Crist ni baxhallu.

²⁸ Naj abejnreni dzunguijdx si'cni galooli guniilu gac.

29 Naj Guejblu Xtiosnu, bahuu xho cagusacsíreni nuure, gucnäj nuure te gutiplaaznu, te na'c guidx-eebnu guiniinu xtiidxlu, sa'csi najcnu rexpeljlu.

30 Baniidx xcälrnibeelu loonu te guisiajcnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

31 Che gulujx gurejdxreni lo Dios, gusloj canib-sejz yu' cadro tre'reni, cayac si'c te xu. Dxejcti biäd Sprit Dxan xten Dios basutijpruni las-tooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

32 Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni.

33 Gucnäj Dios reapost, gusutzu'tzreni bijreni diidx bahuilojreni loj Jesucrist che gubañsacni lo rebeñgut. Gucnäj Dios guiraa rexpelj Jesucrist, luxh gopduxh rebeñ guejdx respe'treni.

34 Ni'cla tejreni di niädax xhixtenni sa'csi renani gojp xyujni, rolijzni, bato'renini, dxejcti biädnäreni xcuentni,

35 badeedreni meelga lo reapost. Dxejcti gudis reapost meelga lo guiraa renani rquiinni.

36 Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni).

37 Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías näj chäälni rujn dojl

¹ Guyu' stee niguii ni laa Ananías. Chäälni laa Safira. Bato'reni te la' yuj.

² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujnni.

³ Dxejcti räjp Pedr lojni:

—Ananías, ¿xhicuent rusoblu xtidx Satanás ni rnibee lo reben_udxab, ä? ¿Xhicuent rlajzlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj.

⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni.

⁶ Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

⁷ Pet agujc choñ or gujtni chela bidzujñ chäälni Ananías. Dini gan agujt chäälni.

⁸ Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

⁹ Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlajztu gusgueetu Sprit Dxan

xten Dios? Ro lä' siääd renani huicua'tz chäällu. Naj näjza luj chacua'tzreni nen baa.

¹⁰ Si'ctis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatzgajcrenini cuä' baa cadre biga'tz chäälni.

¹¹ Bidxebduxh guiraa rexpejn Jesucrist, näjza guiraa rebejn nani biejn diajgni recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx nen cordoor ni laa Salomón.

¹³ Guyu' xhidajl bejn ni di nuchaag lo rexpejn Jesucrist sa'csi bidxejbreni guchaagreni lojreni. Rebenguejdxga guläpduxhrene xpala'n rexpejn Jesucrist.

¹⁴ Nen redxejga xhidalduxh rebejn huililajz xtidx Jesucrist, niguii sigajc gunaa.

¹⁵ Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni.

¹⁶ Guedx Jerusalén bidzujñ xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' bendxab nen lastooreni. Con xcälrnibee Jesucrist basiajc reapost reben racxhuu, gulääzarenı rebendxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu.

18 Gunaazreni reapost. Basäurenini neñ latzguiib.

19 Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost neñ latzguiib. Räjpnı lojreni:

20 —Colchäj guidoro. Ro'c colguinii lo rebejn xho gac guibannäjreni Dios par tejpas.

21 Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejn.

Dxejc bixhojz nani rnıbee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunıbeereni jiadnä reguixhajg reapost nani biäu neñ ladtguiib.

22 Che bidzujn reguixhajg latzguiib, bahuii reguixhajg neñ latzguiibga, niluxh rut yu'di neñ latzguiib. Che gubi'reni biädnäreni diidx, räjpreni loj reguxhtis:

23 —Che bidzunu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neñ latzguiib.

24 Che biejn diajg bixhojz ni rnıbee, näjza capitán nani rnıbee resoldaad xten guidoro, näjza rebixhojz, ben tio'p lajzreni, räjpnı lo sa'reni:

—¿Xhini'c gujc? ¿Xhoni gac naj? —räjpreni.

25 Dxejcti bidzujn te niguii, räjpnı lojreni:

—Reniguii ni basäutu neñ latzguiib, areni suga' neñ guidoro, luxh caguluiireni rebejn —räjpnı.

26 Dxejcti sanä capitán xten resoldaad rexcuxhtis guidoro te biädnäreni reapost, luxh direni

nusacsí reapost sa'csi rdxejbreni nucuaareni guij yejcreni.

²⁷ Che bidzunnäjreni reapost, räjpreni suureni nez loj reguxhtis xten Israel, sas gunii bixhojz ni rnibee,

²⁸ räjpmi loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlaiztu cuaquijtu nuure bagu'tnu Jesucrist.

²⁹ Dxejc räjpmi Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn.

³⁰ Bagu'ttu Jesucrist che bacuaatuni lo cruzj. Niluxh Xtios xtagoldoonu guläsni lo rebengut.

³¹ Naj agule'c Diosni xladbeeni cadre rnibeeni, abadeeda Dios yälrnibee loj Jesucrist te guslaani nuure, te si'c rlaizni guibicaj xtojł guiraa rexpejn Israel nani gusiechlaizreni.

³² Bahuiloonu xhi bejn Dios. Ni'c cagusule'nu. Nadoncheenu Sprit Dxi xten Dios cayacnäj nuure te gusule'nu rediidxre. Badeed Dios Sprit Dxi xtenni lo guiraa renani susoob xtiidxi.

³³ Che biejn diajg reguxhtis rediidxga, bidxechduxhrene, rlaizreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost nen yu'ga.

³⁵ Dxejcti räjpmi Gamaliel lo rebixhojz:

—Guejbtu rexpejn Israel, colyensa'c xhigab xhini'c rlaiztu gunnäjtu reniguiire.

³⁶ Col_zaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn_ni. Che bagu'trenini, bire'ch guiraa rexpejn_ni, xhetru bejndireni.

³⁷ Nen_n ijz ni guyu' cens, biriiza Judas ni siääd Galilee. Dxejc gurejdxni xhidajl bejn_n ni huinajlni. Bagu'tza bejn_ni, dxejcti bire'chza guiraa reni huinajlni.

³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni.

³⁹ Palga xtzuun Dios ni cayujnreni, digacdi guscüääznu dzuunga, sa'csi guidil_nu guidxe'ch Gueb Dios loonu.

⁴⁰ Bichagljaz rebixhojz xtiidx Gamaliel. Gurejdxreni reapost, dxejcti gudijnreni reapost, gurnibeereni loj reapost na'cru guiniireni xtidx Jesús. Dxejc baslaarenini.

⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist.

⁴² Guixe-guixee la_tis baluiireni xtidx Jesucrist nen_n guidoro näjza rolijz bejn_n. Cagusule'reni diidx lo rexpen Israel:

—Jesús najc Crist nani cabääztu jiääd.

6

Gulereni reniguii ni gudeed yätxtiil lo rexpejn Jesucrist

¹ Nen_n redxejga, xhidalro gujc rexpejn Jesucrist. Niluxh gusloj camojm_n rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud.

³ Ni'c nanab cuetu lo resa'tu gajtz niguii nani nantju najc be_nsa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni.

⁴ Te si'c sajc chanuutis guiniabnu lo Dios, guiluizanu xtidx Dios lo rebejn.

⁵ Guiralii rebejn ga bidxagljazreni diidxga. Dxejcti gulereni Esteban, te niguii ni rlilajzpac xtidx Dios, rbäjzsa Sprit Dxan xten Dios neñ lastooni. Gulezaren Felipe, Prócoro, Nicanor, Timón, Parmenas; gulezaren Nicolás nani siäd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist.

⁶ Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzunreni.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazreni Esteban sanärenini lo rebixhojz nani rnibee

⁸ Gucnäduxh Dios Esteban, bejnini redzunro, remilagwr nez lo rebejn.

⁹ Dxejc reben guidoo ni laa Libertados gusloj cadilnäj Esteban. Lojreni nadxaag beñ Cirene, näjza beñ Alejandría, näjza gaii beñ Cilicia, näjza sgaii bejn ni siääd reguedx Asia.

¹⁰ Reniguiire di niajcdi nuzejcreni diidx lo Esteban, sa'csi nasinduxhni, luxh cayacnäj Sprit Dxan xten Diosni.

¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹² Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel.

¹³ Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten toMoisés näjza guidodxanre.

¹⁴ Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulii si'c guniilu, ä?

² Räjp Esteban lojreni:

—Colgucua diajg rextidxä, guejbtu dad, näjza resa'ä. Xtioznu ni sacduxh, ni rnibee,

baluiloj lo toxtadgoldoonu Abram che guläjzni Mesopotamia, che gajdni chaläjz nen̄ guedx Harán.

³ Räj̄p Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu”

⁴ —räj̄p Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädñä Dios toAbram nez ree, cadre rbääznu ñaj.

⁵ Di Dios nuzalajz nicla tla' yuj cadre suu te ni' toAbram. Niluxh räj̄p Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc.

⁶ Stee huält räj̄p Dios lo toAbram: “Rexi'nlu, rexagdoolu, siläjzreni si'c beñzajt. Ladxbejn̄ gacreni mos, ro'c susacsí bejn̄reni si'cti tajp gayuu ijz.”

⁷ Räj̄p Dios: “Narä sunä castiigw rebejn̄ ni gusacsíreni che najcreni mos. Narä cuää rexagdoolu ro'c, te ree guzuxhijbreni loä nen̄ guejdxre”, si'c räj̄p Dios

⁸ —räj̄pza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn̄ dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen̄ Israel.

⁹ Räj̄p Esteban:

—Guitzubiteb rexi'n Jacob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José.

10 Che gudejd José trabajwduxh, gucnäj Diosni. Badeed Dios yäl_nasiñ_duxh lojni. Bejn Dios bichag_lajz reii Faraón José. Badeed reii Faraón gujcní gubernadoor xten Egipto. Gunibeeza José guira'ti xhixten reiiga.

11 Räj_pza Esteban:

—Che bidzujñ dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejñ. Xhet guyu'di xhi niajw retoxtadgoldoonu.

12 Che biejn diajg xtadgoldoonu Jacob yu' xhi gaureni neñ reguejdx xten Egipto, ro'c baxhalñi rexi'nni, bica'reni xhi gaureni te huält.

13 Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José.

14 Dxejcti baxhal José diidx jääd xtadni Jacob, näjza guiraa resa'ni, cuääzreni Egipto. Najc rebejñga si'cti gayoñbitzubigaii bejñ.

15 Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtadgoldoonu.

16 Dxejcti huinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

17 Räj_p Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto.

18 Dxejcti guyu' te xreii Egipto ni di gan guiraa redzunsac nani bejn toxtadgoldoonu José.

19 Reiiga basgueeni rexpengoldoonu, basacsínireni, trabajwduxh bateedni rex-

pen_goldoonu. Gunibee reiiga basäl_reni guiraa rebäz niguii te di la_reni, te guetreni.

²⁰ Ne_n redxejga, gojl Moisés. Che gujc Moisés báz, te báz daani, saru rujn lojni, huinälajz Diosni. Gulaani cho_n bäii rolijzni.

²¹ Dxejc huisäl_renini, te guzobj xtidx Faraón. Dxejc lagajc xindxa'p Faraón bidxäl_ni Moisés, cua'nini baslaanini si'c xi'nni.

²² Bisieed Moisés guiraa ni najn rebe_n Egipto. Gunisa'cni diidx, bensa'cni dzuun.

²³ Räj_p Esteban:

—Che guyu'ni tiuu ijz, banaj lajzni resa'ni ni najc xpej_n Israel, huijni cadro rbäjzreni.

²⁴ Dxejc bahuiini casacsí te be_n Egipto te be_n sa'ni. Sas bagu'tni be_n Egipto.

²⁵ Bejn Moisés xhigab pet sacbee resa'ni cayacnäj Diosni te guslaani rexpej_nni. Luxh di resa'ni niacbee si'c.

²⁶ Che bara yääl, bahuii Moisés cadil_näj sa'reni tiop xpe_n Israel. Räj_p Moisés lojreni: “Colcuedxi, Dad. Lagajc sa'tu cadil_näjtu. ¿Xhicuent rdijl_tu?” si'c gunii Moisés, te na'cru til_näj sa'reni.

²⁷ Dxejcti nani cayunniälajzga, balanaani Moisés, räj_pni loj Moisés: “¿Chu baniidx yäl_rnibee lojlu te jiäd_nibeelu nuure?”

²⁸ ¿La r_lajzlu ju'tlu narä si'c bagu'tlu be_n Egipto naii?” —räj_pni—.

²⁹ Che biejn diajg Moisés rediidxga, baxun_ni, huijni zijt. Huiläzsijcni guedx Madián. Ro'c bach_naani, guyu' tiop xingaanni.

³⁰ Räj_pza Esteban:

—Che gudejd tiuu ijz, bidzuj_n te dxej cansajni nez lo reyubijdz ni naga' guideb gabi dajn ni laa

Sinaí. Ro'c bahuini te bajl nen te yaguejch. Nen bajlga baluiloj angl xten Dios lo Moisés.

³¹ Bidxeloduxh Moisés che bahuini si'c. Dxejcti gubigni te rlazni nuhuisa'cni yajgga. Dxejc biejn diajgni gunii Dios, räjpni lo Moisés:

³² “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti gucez Moisés sa'csi bidxebduxhni, diruni nuhuisa'c yajgga.

³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree.

³⁴ Abahuiä xho cagusacsí reben Egipto rexpenä. Abiejn diagä xho roonreni. Naj abiälä te guslää rexpenä. Gudaa naj, suxhalälu chäälü Egipto.”

³⁵ Räjp Esteban:

—Dios badeed yälrnibee lo Moisés nani baze' retoxtadgoldoonu che räjpreni: “¿Chu baniidx yälrnibee lojlu te jädnibeelu nuure?” Baxhal Dios Moisés te guinibeeni xpejn Dios, gucnäjza Dios Moisés baslääni rexpejnni nen nación Egipto si'c gunii angl xten Dios che baluilojni lo Moisés nen yaguejchga.

³⁶ Gulää Moisés rebejnğa. Ganiddoo bejn Moisés redzunro, yälrdxeloj nen nación Egipto näjza ro' nisdoo ni laa nido xniaa. Tiuu ijz cuansaj retoxtadgoldoonu nen yubijdzroga, ro'c bejnza Moisés redzunro, remilagwr.

³⁷ Lagajc Moisésre gunii xtidx Dios che räjpni loj rexpejn Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.”

³⁸ Lagajc Moisés guyunäj rebejn nen yubidzro. Xangl Dios guninäj Moisés nen dajn xten Sinaí.

Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

³⁹ Räjþ Esteban:

—Niluxh di retoxtadgoldoonu nusoob rextidx Moisés. Di rlajzreni gunibee Moisésreni. Canaduxhlajzreni nación Egipto.

⁴⁰ Che sää Moisés dajñ Sinaí, räjþreni loj Aarón bejtz Moisés: “Benchee banäjþ gac xtiooznu, te nidreni loonu, te chanajlnureni. Chu gan con Moisésre ni baluii nezyuj che gulääni nuure guejdx reEgipto.”

⁴¹ Sas bencheereni te banäjþ ni najc si'c te gonbäz. Dxejcti bagu'treni guidxaa te badeedreni rejnga lo banäjþ te bazuxhijbreni lojni. Bibalazduxhreni sa'csi abencheereni banäjþga.

⁴² Dxejcti gubicaj Dios loj rexpejñ Israel sa'csi bejnreni si'c. Basaan Dios gojñreni gubijdx, näjza bäii, näjza rebal xhaguibaa. Gujñni si'cni caj lo guiñtz ni bejn reniguii nani bacuaa rextidx Dios. Räjþ Dios:

La'tu beñ Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejñreni, ä?

⁴³ Xho gacni si'c, räjþ Dios.

Cuansanäjtu te yu' najcw guiñd cadre chu te banäjþ.

Neñga guyu' banäjþ ni laa Moloc, nani najtu najc xtiostu.

Gojñzatu balbäze' xten xtiostu ni laa Remfán.

Redios ni bencheetistu reni'c gojñtu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjpni lojreni:

—Nen reyubijdz gojp retoxtadgoldoonu te yu' najcwni guijd. Gujcn̄i xquidooreni. Ro'c guninäjreni Dios. Benchee retoxtadgoldoonu yu' najcw gujdgä si'cni gunibee Dios che baluiini lo Moisés xhoni gacni.

⁴⁵ Che gujt Moisés, Josué gunibee lacuaa to-Moisés, huinäni retoxtadgoldoonu naciön Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn̄ ni guläjz nen̄ reguedx Canaán. Dxejcti bia'n retoxtadgoldoonu nen̄ reguejdxga. Bazuxhijbreni lo Dios nen̄ yuguid ni najc xquidooreni che gojlli xtiemp̄ rei David.

⁴⁶ Huinäläjz Dios David. Räjp David lo Dios: “Rläzä gunä te guidoo par guejblu, Dios xten nure, rexpejn̄ Israel.”

⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios.

⁴⁸ Naj di Dios guiquiin te yu' nani runchee bejn̄. Scree bacuaa te niguii nani gunii xtidx Dios. Räjp Dios:

⁴⁹ Si'c najc te yagxhilsa'c cadre rnibee rei, si'c najc xhaguibaa cadre rbeä.

Si'c te bancw cadre rsiuj ni' rei, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadre gusilazä, räjp Dios.

⁵⁰ ¿La et naädi benchee guiraa nani ruhuiitu?, räjp Dios.

⁵¹ Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuun Sprit Dxiän xten Dios, dizani cuääz neñ lastootu. Si'c beñ rextadgoldootu, si'cza rujntu.

⁵² Basacsí rextadgoldootu guiralii reniguii nani gunii xtidx Dios. Niela tejni direni niu. Bagu't rextadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätuni lo guxhtis te gunibeetu gajtne.

⁵³ La'tu biannäjtü leii nani gunii reangl xten Dios loj Moisés, luxh la'tu ditu nucuadiajg rediidxga.

Bagu'treni Esteban

⁵⁴ Che biejn diajgteni rextidx Esteban, bidxe'chduxhteni, rauya' läijteni sa'csi rdxe'chteni lo Esteban.

⁵⁵ Rbäjz Sprit Dxiän xten Dios neñ lastoo Esteban, ni'cni bahuiztu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios.

⁵⁶ Räjpn Esteban lojteni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhteni basäuzareni diajgteni. Dxejcti baxunreni bixa'treni yejc Esteban.

⁵⁸ Dxejc gudobyujrenini, gulääreni Esteban nen guejdxga. Ro'c bacuaareni guij yejc Esteban. Che cagucuaareni guij yejcti, guläyalreni xhajbreni; te niguii ni laa Saulo biannäj xhajbreni.

⁵⁹ Lañ ni cagucuaareni guij yejcti, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuauqijlureni.

Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh nen guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban.

³ Biäädza Saulo, guixe-guixee basacsíni rebejn nani huililajz xtidx Dios. Biu'ni rolijzreni, gunaazni reniguii näjza regunaa te basäunireni nen latzguiib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni.

⁵ Tej rebejnga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jääd.

⁶ Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe.

7 Gaii bejn̄ yu' beṇḁxab neṇ lastooreni. Che gunibee Felipe guirii rebēṇḁxab lastoo rebejn̄ga, guredxa' rebēṇḁxabga, dxejcti biriireni neṇ lastoo rebejn̄ga. Yu'za xhidajl bejn̄ nani digacdiru guiniib, yu'za reni rajc ni'reni, ṇaareni. Con xcäl̄rnibee Jesucrist basiajc Felipe guiraa rebejn̄ga.

8 Sa'csi gujc si'c, bibalazduxh guiraa rebejn̄ neṇ guejdxga.

9 Guyu' te niguii ni laa Simón neṇ guejdxga. Bisieedni bejn̄ni xhidajl redzuun yäl̄bidxaa, basgueeni rebēṇguejdxga. Bidxeloduxh rebēṇguejdx lojni. Räjpn̄i lo rebejn̄ rutru chu stee bejn̄ ni najc maazru beṇro lojni.

10 Luxh guiraa rebejn̄, rebiuux, rebēṇgool, rebenrajp, rebenproob bacuadiajgreni xtidx bidxaaga, räjpreni:

—Laani rajpn̄i yäl̄rnibee xten Dios.

11 Xchero basgueeni rebejn̄, bidxelojreni rextzunyaäl̄bidxaani. Guiraa rebejn̄ huililajz xtiidxni.

12 Dxejcti baluii Felipe xcuent xcäl̄rnibee Dios, nājza xcuent Jesucrist. Xhidajl rebēṇguejdxga huililajz rediidx nani gunii Felipe. Dxejcti birob-nisreni, niguii nājza gunaa.

13 Nägajcza Simón huililajz rediidxga dxejc gurobniszani. Dxejc guyunāj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

14 Che biejn diajg reapost ni yu' guedx Jerusalén huililajz reben̄ Samaria xtidx Dios, baxhal̄reni Pedr nājza Juan ro'c.

15 Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxian xtenni lojreni,

16 sa'csi gajd Sprit Dxian xten Dios jiädläjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist.

17 Dxejc batzuub Pedr näjza Juan ñaareni yejc tejga renani ahuililajz xtidx Dios, dxejc badeed Dios Sprit Dxian xtenni biädläjzni neñ lastooreni.

18 Che bahuii Simón biädläjz Sprit Dxian xten Dios lastoo rebejn ni batzuub reapost ñaani yejcreni, rlanj Simón nudeedni meel loj reapost,

19 räjpni lojreni:

—Cołguniidx yälrnibee loä te si'cza gudzubä ñaä yejc rebejn, te jiu' Sprit Dxian xten Dios neñ lastooreni.

20 Dxejcti räjp Pedr lojni:

—¡Sunitloj xmeellu con luj! Xho gunlu xhigab siilu Sprit Dxian xten Dios nani rudedxlia' Dios.

21 Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu.

22 Basie'ch lajzlu, badzucaj rehxigab guijdx xtenlu. Guredx-gunab lo Dios, top susiäjł lajz Dios xtojllu ni bejnlu neñ lastoolu.

23 Naj narä nanä ruguilazduxhlu, luxh runduxhlu xhigabguijdx.

24 Dxejcti räjp Simón lo guiro'preni:

—Cołnab loj Dios xcuentä te na'c sacä si'cni canitu.

25 Che gulujxti bijreni diidx xcuent ni bahuilojreni bejn Jesucrist, che gulujx basule'reni

xtidx Jesucrist loj reben Samaria, gubisacreni Jerusalén.

Felipe näjza te dade' ni siääd naciön Etiopía

²⁶ Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

²⁷ Sä'ti Felipe. Che bidzujñni lo nezyujga, bidx-aagni te dade' ni siääd naciön Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios.

²⁸ Siädbisacni lajdxni. Sobga'ni neñ te gare't saruduxh, cayolñi xtidx Isaías, nani bacuaa xtidx Dios agujc xchero.

²⁹ Dxejcti räjp angl xten Dios lo Felipe:

—Gubig cuä' gare'tga, guninäy dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijtz nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijtz ni caj xtidx Dios rnii scree:

Di xiil cuedxa' che rinä bejñni cadro guetni; dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujn yälguxhtisni xhet laliidi bejnreni.

Xhet si'cti nunyäjł gunreni.

¿Xho guiniinu yu' xpejn̄ni?

Ni abagu'trenini. Diruni guibajn̄ lo guedxliuj.

³⁴ Dxejcti gunabdiidx beñ Etiopía, räjpn̄ni lo Felipe:

—Gunilaa loä, chuni'c ruzä't niguui nani bacuaa reguijtzre, ¿la ruzä'tni lagajc laani o la ruzä'tni ste'ca bejn̄, ä?

³⁵ Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist.

³⁶ Lal̄ ni sääreni lo nezyuj, bidzujñreni te lajt cadre yu' nis. Dxejc räjp dade'ga lo Felipe:

—¡Bahuii, ree yu' nis! ¿Xhi rudxojn̄ tiobnisä?

³⁷ Dxejc räjp Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga.

³⁹ Che biriireni neñ nis, huiinä Sprit Dxi xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni.

⁴⁰ Dxejcti chela gucbee Felipe abidzujñni guedx Azoto. Baluiizani xtidx Dios neñ guiraa reguejdx che bidzujñlini guedx Cesarea.

9

*Huililajz Saulo rextidx Jesucrist
(Hch. 22:6-16; 26:12-18)*

¹ Laltis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee,

² gunabni gac te guijtze chanäni lo reguidoo nen guedx Damasco te palga guidxäläni reni najc xpejn Jesucrist nen reguidooga, niguii sigac gunaa, guli-ibnireni, jiädänireni guedx Jerusalén te jiäureni.

³ Lal sasajni lo nezyuj, asiäddzungenajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo.

⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpena?

⁵ Räjpe Saulo lojni:

—¿Chuluj Dad?

Räjpe lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní yejc caru'ch.

⁶ Bidxebduxh Saulo, racsejsni räjpe:

—Dad, ¿xhini'c rlajzlu gunä?

Dxejc räjpe Jesús lo Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejn ni siädnä Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni.

⁸ Che huistie Saulo lo yuj, baxhalni lojni, niluxh di lojni jieñ. Dxejc gunaazreni ñaani, sanärenini guedx Damasco.

⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

¹¹ Räjp Jesucrist lojni:

—Huistie te chäálu lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, ben Tarso. Cabejdx, canabni loä naj.

¹² Lo bacal abahuiini siääd te niguii ni laa Ananías te gutzuubni naani yejcn te fiini stehuält.

¹³ Dxejcti räjp Ananías lojni:

—Dad, abiejn diagä xho basacsí niguiiga rexpejnlu nen guedx Jerusalén.

¹⁴ Luxh rebixhojz ni rnibee abadeed guijtzt lojni te guiniaazni ree guiraa rebejn nani rbedx-rniab lojlu, chanänireni jäureni.

¹⁵ Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel.

¹⁶ Narä suluiä lo Saulo trabajwduxh ni tedni te jäädnajlni narä.

¹⁷ Dxejcti sää Ananías, bidzujn ro yu' cadre rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siäädlu, lagajc laani baxhalni narä te filu stehuält, te jäädläjzza Sprit Dxan xten Dios nen lastoolu.

18 Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni.

19 Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

Gusloj basule' Saulo xtidx Dios nen guedx Damasco

20 Dxejcti gusloj basule' Saulo xtidx Dios nen reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

21 Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist nen latzguiib guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

22 Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

23 Che gudejd xhidajł dxej, bachagsa' rexpejn Israel te nugu'treni Saulo.

24 Dxejcti guchee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini.

25 Dxejcti che gojł te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujñ Saulo guedx Jerusalén, rlazjni nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzni xtidx Dios.

²⁷ Dxejcti huinä Bernabéni lo reapost, bijni diidx xcuent Saulo. Räjñ Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist.

²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilñäj Saulo rexpejn Israel nani rnii didx griegw. Laareni rdxechduxhreni, rlazjreni nugu'treni Saulo sa'csi direni nichagljajz xtidx Jesucrist.

³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsí rexpejn Jesucrist, luxh guc xhidajl-rureni. Basoobreni xtidx Jesucrist, bisieedrureni rextiidxni, gucnäjza Sprit Dxañ xten Diosreni.

Biajc Eneas

³² Che gusloj sahuü Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida.

³³ Ro'c bidxälñi te niguii ni laa Eneas. Agujc xhujñ ijz naga' niguiiga cayacxhuuni. Abixu'ñ tiejxhni, digacdiru guiliini.

34 Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcnì, huistietini.

35 Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni neñ reguejdxga huililajz xtidx Dios.

Guban_{sac} Dorcas

36 Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin reben_{proob}, najczani huenduxh loj chutis bejn.

37 Gucxhuu gunaaga, dxejc gujtni. Che gulujx bahuajz rebejn togoolga, huitixhrenini neñ te yu' ni najc jiaa yejc sa'ni.

38 Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

39 Dxejc sanägajc Pedr redade'ga. Che bidzujnreni, huinäreni Pedr neñ yu' cadro naga' togunaaga. Ro'c cayonduhx guiraa regunabiuud, baluiireni lo Pedr guiraa rexhajnreni nani benchee Dorcas, ni badeed Dorcas lojreni che nabajn_{ni}.

40 Dxejcti gunibee Pedr birii guirarenì neñ yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni.

⁴¹ Dxejc gunaaz Pedr ñaani, basuliinini, dxejcti gurejdx Pedr regunabiuud nājza sgaii reni najc rexpejn Jesucrist. Baluiini gunaaga lojreni te bahuilojreni agubansacni.

⁴² Gucbegajc reben guedx Jope xhini'c gujc, dxejcti xhidajl rebejnnga huililajz xtidx Jesucrist.

⁴³ Xchejza guyu' Pedr ro'c, gulājzni rolijz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac beñ Israel.

² Bensacduxh najc Cornel, nājza guiraa resa'ni, sacruduxh rusoobreni xtidx Dios. Rudeedni gojn lo reben prob xten Israel. Guixe-guixee rbejdx, rniabni lo Dios.

³ Te dxej, si'cti rcachon gudxej, si'c lo bacal bahuiini loj xangl Dios, räjpni loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidx-elojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben prob, ruhuii Dios ni rujnlu, ni'cni rnalajz Dios luj.

⁵ Naj baxhal tiop niguii chää guedx Jope te chaxiireni Simón Pedr.

⁶ Rbäjzni rolijz te dade' ni laa Simón nani rus-coodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni näjza te xsoldaadni nani sanälajz Dios.

⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyuj. Asiäddzungenajxhrenei guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios.

¹⁰ Calanduxh Pedr, rlajzni gauni. Lał ni cayujn-renei xhi gauxhuejni, gusloj canixcałni.

¹¹ Bahuiini bixal xhaguibaa, bahuiizani biäjť te bariadro nani naliib guidap xi'ni. Siädjiätchäiini gajxh nez loj Pedr.

¹² Nen bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt.

¹³ Gunii Dios lo Pedr, räjpni lojni:
—Pedr, huisu te ju'tlu man gaulu.

¹⁴ Dxejc räjp Pedr lojni:
—Na'c Dad. Nunc gauä sa' remandxuudxga, abia'a dina gauä reman nani rnii xleiilu najc mandxuudx.

¹⁵ Gunisac Dios loj Pedr, räjpni:
—Na'cru guiniilu nacdXuudx reman nani abasia.

¹⁶ Che gujc choñ huält gujc si'c, huä'psac bariaadga xhaguibaa.

¹⁷ Lał ni cayujn Pedr xhigab xhichani'c säloj nani bahuiini, bidzujñ reniguii ni baxhal Cornel

ro' yu'ga, sa'csi agunabdiidxreni caro rbäjz Simón nani ruscoodz guiijd.

18 Che bidzujñreni rolä'ga canabdiidxreni la ro'c rbäjz te dade' ni laa Simón Pedr.

19 Lal ni cayujñ Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choñ dade' caguiillu.

20 Biäjť yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

21 Dxejcti biäjť Pedr jiaaga, bidzujñni cadro suga' redade'ga, räjpni lojreni:

—Narä nacä ni caguiiltu. ¿Xhi siäädťu?

22 Räjp reniguiiga lo Pedr:

—Cornel, nani rnibee te gayuu soldaad, te beñsa'c, te bejñ ni rajñ Dios, te bejñ ni sanälajz rexpejñ Israel, laani baxhal nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

23 Dxejcti gurejdx Pedr rebejñga, biu'reni neñ yu'. Ro'c bia'nreni te guxhijñ. Che bara yääl, Pedr näjza sgaii beñ Jope ni najc xpejñ Jesucrist, sanä redade' ni baxhal Cornel.

24 Che bara yääl, bidzujñreni guedx Cesarea. Abatojp Cornel resa'ni näjza reexamigwni rolizñi. Cabäjzreni guidzujñ Pedr.

25 Che bidzujñ Pedr ro yu', huichagloj Cornelni, bazuxhijbni lo Pedr.

26 Dxejc gunaaz Pedr ñaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

27 Cayuiireni diidx, biu'reni neñ yu'. Che biu'ni bahuii Pedr nadxagsa' rebejñ neñ yu'.

28 Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj beñzajt nani digac xpejn Israel, digacdiza jiu'ni rolijzreni. Niluxh agunii Dios loä lo te bacal, te gacheä digacdiru jiuä releiire. Abaluii Dios narä sajc guchagsa'ä chutis bejn.

²⁹ Ni'cni, che gurejdxtu narä biälgacä. Naj rniabdidxä, ¿xhicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachon gudxej, cabedxcanabä lo Dios rolizä chela baluiloj te niguii najcw te ladnol ni rdimbicha'.

³¹ Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo reben proob, racbee Dios, di lajzni jääl luj.

³² Ni'cni naj baxhal tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guijs. Rolijzni sojb gajxh ro' nisdoo. Che guidzujjni, laani gusule'ni xtidx Dios lojtu.”

³³ Dxejc baxhalä chu biädxiiilu. Xquixtiostelu biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴ Dxejcti räjp Pedr lojreni:

—Naj gucbeliä tebloj rinälajz Dios guiraa bejn; rebenzajt sigajc rexpejn Israel.

³⁵ Niluxh rinälajz Dios chutis beñ guedxliuj nani ruzuxhijb lojni, nani rusoob rextiidxni, nani laaca nabajn.

³⁶ Badeed Dios xtiidxni loj rexpejn Israel, basule' Dios biääd Jesucrist te gac chanälaaznu Dios

te cuedxilajznu, sa'csi Jesucrist rnibee guideb guedxliuj.

³⁷ Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea.

³⁸ Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dxan xtenni te cuääzni neñ lastooni. Nancheetu xho bejni redzunro, remilagwr, basiajcnı rebejn nani caguteed beñxab trabajwduxh. Redzunroga bejni sa'csi bennäj Diosni dzuun.

³⁹ Bahuiloonu guiraa redzuun ni bejn Jesucrist neñ reguedx Israel näjza guedx Jerusalén. Bacuaa rexpejn Israel Jesucrist lo cruzj, ro'c gujtni.

⁴⁰ Dxejcti che biojn dxej, guläs Dios Jesucrist lo rebeñgut, gubañsacni, badeed Dios yälrnibee lojni te gujc biädluiloj Jesucrist loonu.

⁴¹ Di Jesucrist nululoj loj chutis bejn. Lojtis renani agule Dios gutie'ch diidx gubañsac Jesucrist lo rebeñgut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubañsacni lo rebeñgut.

⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebeñbajn näjza xte rebeñgut.

⁴³ Galooli bacuaa renani gunii xtidx Dios lo guijtz, räjpreni: “Guiraa rebejn ni chalilajz xtidx Jesucrist sudzucaj Dios xtojlreni.”

Biädlajz Sprit Dxan xten Dios neñ lastoo rebeñzajt

⁴⁴ Lał ni canii Pedr rediidxga, biädläjz Sprit Dxan xten Dios neñ lastoo renani huililajz xtiidxni.

⁴⁵ Bidxeloj guiraa rexpejn Israel nani huiñä Pedr sa'csi biädläjz Sprit Dxañ xten Dios neñ lastoo renani najc benzijt.

⁴⁶ Guçbeereni biu' Sprit Dxañ xten Dios lastoo rebenzijt sa'csi bejn Sprit Dxañ guniireni stee didxsaj nani gajdreni guisieed, calä'pzareni xpala'n Dios.

⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädläjz Sprit Dxañ xten Dios neñ lastoonu, abiädläjzni neñ lastoo rebejnre.

⁴⁸ Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

11

Basule' Pedr xho biädlajz Sprit Dxañ xten Dios lastoo rebenzijt lo rexpejn Jesucrist neñ guedx Jerusalén

¹ Reapost, näjza renani huililajz xtidx Jesucrist neñ reguedx Judea, biejn diajgreni huililajz rebenzijt ni digac xpejn Israel xtidx Dios.

² Che bidzujñ Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilñäjreni Pedr.

³ Räjpreni lo Pedr:

—¿Xhicuent biu'lu rolijz benzijt nani xhet yu'di bee si'c nuure? ¿Xhicuent gudaunäjlureni, ä?

⁴ Dxejcti basule' Pedr diidx xho gujc huijni loj rebenzijt:

⁵ —Yu'ä guedx Jope. Cabedx-canabä lo Dios, dx-
ejc si'c gunixcalä, bahuiä bixal xhaguibaa, siädjiäjt

te bariadro, naliib guidap xi'ni. Siädjiätchäiini nez loä.

⁶ Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt.

⁷ Dxejcti biejn diagä naj Dios loä: “Pedr, huisu. Bagu't man gaulu.”

⁸ Dxejcti räpä: “Digacdini Dad. Nicla tej gadna gauä te man nani rnii leii xtenlu najc mandxu-udx.”

⁹ Dxejc gunisac Dios loä: “Na'cru guiniilu nacdXuudx recos nani abasia Dios.”

¹⁰ Che gujc choñ huält gunii Dios si'c, huä'psac bariaadga xhaguibaa.

¹¹ Lagajc orga bidzujñ choñ dade' ro yu' cadre yu'ä. Guedx Cesarea biriireni, biädxireni narä.

¹² Dxejc gunii Sprit Dxiän xten Dios loä: “Huinä reniguiire. Na'c gun tiop lajzlu.” Dxejcti huinää xho'p beñ Jope, dade' nani rililajz xtidx Jesucrist. Che bidzujñnu guedx Cesarea, biu'nu rolijz Cornel.

¹³ Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxhañ tiop dade' chää guedx Jope te chaxiireni Simón ni rniireni Pedr.

¹⁴ Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.”

¹⁵ Che gusloj cagusule'ä xtidx Dios lojreni, biu' Sprit Dxiän xten Dios neñ lastooreni si'c biu'ni lastoonu galooli.

¹⁶ Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxiän xten Dios te cuääzni neñ lastootu.”

17 Dxejc räjpza Pedr:

—Palga badeed Dios Sprit Dxaan xtenni lojreni si'c baniidxni Sprit Dxaan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxaan xtenlu lojreni.”

18 Che biejn diajg reben Jerusalén rediidxga, biäuu ro'reni, dirureni nidilnäjä Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechljazreni te guibannäjreni Dios par tejpas.

Rexpejn Jesucrist ni yu' guedx Antioquía

19 Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel.

20 Lojreni nadxaag gaii ben Chipre, näjza gaii ben Cirene. Redee bidzujn guedx Antioquía. Ro'c gusloj caniireni lo benzajt nani rnii didx griegw. Basule'reni lo rebenzajtga guiraa xcuent Jesucrist.

21 Guenäjä Diosreni caniireni xtiidxni. Xhidajl rebejnğa huililajz xtidx Jesucrist, basoobreni xtiidxni.

22 Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía.

23 Che bidzujn Bernabé guedx Antioquía, bibalazduxhni che bahuiini xho cayunnäjä Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist.

24 Bensa'c najc Bernabé. Rililazduxhni xtidx Jesucrist. Racnäjduxh Sprit Dxi an xten Diosni. Xhidajl rebejn huililajz xtidx Jesucrist guejdxga.

25 Che birii Bernabé guejdxga, huijni guedx Tarso satiilni Saulo.

26 Che bidxälni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid beņguejdxga gulälaj "Cristianos" renani rililajz xtidx Jesucrist.

27 Neņ redxejga birii gaii dade' nani rnii xtidx Dios. Guedx Jerusalén biriireni, bidzujņreni guedx Antioquía.

28 Huisulii te dade'ga ni laa Agabo. Gucnäj Sprit Dxi an xten Diosni te guniini siäd te gubijn guideb guedxliuj. Luxh gujc gubijnga neņ reijz ni gunibee reii Claudio ni sajcro.

29 Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neņ reguedx Judea.

30 Batojpreni meel, baxhalrenini lo rebengool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

12

Gujt Jacob, biäu Pedr neņ latzguiib

1 Neņ redxejga, trabajwduxh bateed reii Herodes gaii rexpejn Jesucrist.

2 Gunibeeni gujt Jacob betz Juan, biru' guejni.

³ Che bahuü Herodes bibalazduxh rexpejn Israel sa'csi bagu'tni Jacob, gunibeeni gunazgajczeni Pedr. Dee gujc neñ redxe lanij che rajwreni yätxtiil ni di saguij.

⁴ Che gunaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij.

⁵ Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr neñ latzguiib

⁶ Bidzujnti dxe bispr dxej ni rlajz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj ro' latzguiib.

⁷ Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajñni. Räjpnì lo Pedr:

—Basquejnga, huistie.

Dxejcti bixec recaden, bitejbreni naa Pedr.

⁸ Räjpn xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpn xangl Dios lo Pedr:

—Gojt xhablajzlu, gudanajl narä —räjpnì.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnì xhigab pet canixcalni.

¹⁰ Gudejdreni nez loj te soldaad, gudedgajczeni nezloj steeni, dxejc bidzujnreni ro' puertguiib xten latzguiib nani caj lo nezyuj ni rdej galäii guejdxga. Xtebca bixal puertroga, biriireni gusajreni

tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj.

¹¹ Dxejc si'cni gubaj_n Pedr, bejn_ni xhigab:

—Naj sii nanä baxhal Dios te xangl_ni baslaa narä ladz_naa Herodes te digacdi gun rexpej_n Israel nani rlajzreni gunnäjreni narä.

¹² Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadx-agsa' xhidajl rexpej_n Jesucrist, cabedx-canabreni lo Dios xcuent Pedr.

¹³ Cagusejz Pedr rolä', dxejc gubig te dxa'p ni laa Rode, bacuadiajgni ro lä'.

¹⁴ Che biembee Rode xse' Pedr, sa'csi bibalaz-duxhni, biallajzni nuxhalni ro lä'. Alga baxun_ni biusacni nen_n yu', räjpni lojreni:

—Pedr suga' ro lä'.

¹⁵ Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti laltis cagusejz Pedr ro lä'. Che baxhalreni ro lä' bidxeloduxh_neni bahuiireni lo Pedr.

¹⁷ Dxejcti bazäab Pedr _naani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacob näjza lo rexpej_n Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr nen_n latzguiib.

19 Gunibee Herodes huitiilreni Pedr, gunabdi-idxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

20 Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jiäjł lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo rei Herodes, mos ni sajcro lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebejnğa.

21 Basoobtini te dxej te guininäjnireni. Dxejga gojt Herodes xhajb reiini, gurejni lo xyacxhil reiini. Dxejcti gusloj caniini didxsa'c loj rebejnğa.

22 Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

23 Lagajc dxejc biääd te angl xten Dios, bejni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn n-jcni te dios, sa'csi dini niliä'p xpala'n Dios.

24 Xhidajl bejn biejn diajgni xtidx Dios, huililajzreni xtidx Dios.

25 Che gulujx badeed Bernabé näjza Saulo meel ni batojp reben Antioquía lo rebejnool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxaan xten Dios Bernabé nájza Saulo

¹ Lo rexpejn Jesucrist ni rdxaag sa' guedx Antioquía guyu' gatii niguii ni gunii xtidx Dios, nájza gatii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, náj Simón ni rniireni Negr; náj Lucio, beñ Cirene; náj Manaén ni gulanáj reii Herodes gujcni si'c bejtzni; nájza Saulo.

² Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxaan xten Dios lojreni:

—Colcua Bernabé nájza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzuubreni naareni yejc guiro'preni, te si'c baxhalreni Bernabé nájza Saulo te guluiireni xtidx Dios ste'ca lajt.

Guuro'preni baluii xtidx Dios lo rebeñ Chipre

⁴ Baxhal Sprit Dxaan xten Dios Saulo nájza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre.

⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejn Israel. Náj Marcw gucnäjreni.

⁶ Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios.

⁷ Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio

Paulo. Gurejdxni Bernabé nájza Saulo, sa'csi rla-jzni jiejn diajgni xtidx Dios.

⁸ Dxejcti Barjesús, ni laaza Elimas, bidxagdijl̄ni guiro'preni sa'csi di rla-jzni chalilajz Sergio Paulo xtidx Dios.

⁹ Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, rájpn̄i loj Barjesús:

¹⁰ —Rusgueduxhlu rebejn̄, najclu beñlatsiaj, benguidxduxhlu, najclu xi'n Satanás, ben̄dxab ni rnibee. Rdxechñájzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn̄ xtidx Jesucrist?

¹¹ Naj siääd xcastiigw Dios yejclu. Xhidajl̄ dxej sicäjy lojlu, xhetliidi fiilu —rájpn̄ Pabl.

Gujcsi rájpn̄i si'c, bicäigajc lojni. Dxejctiru cuansajni caguiilni chu guiniaaz ñaani guluini canejz cháäni.

¹² Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl̄ruluii Dios.

Bidzuj̄n Pabl nájza Bernabé guedx Antioquía xten distrit Pisidia

¹³ Che baluux Pabl nájza resa'ni xtzunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panfilia. Che bidzuj̄nreni guejdxga, gubisac Juan, ni rni-ireni Marcw, Jerusalén.

¹⁴ Dxejcti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejn̄ Israel, biu'reni neñ xquidoo rexpejn̄ Israel, ro'c gurejreni.

¹⁵ Che gulujx bil te dade' reguijtz xten Dios ni laa leii nájza reprofet, baxhal reguxhtis xten guidoo chu huigajñreni, rájpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶ Dxejc huisulii Pabl, guläsni naani bejnni seen lo rebejn te cuadiajgreni xtiidxni. Rájp Pabl lojreni:

—Colcuadiajg, la'tu rexpejn Israel, guiraatu ni rajn Dios.

¹⁷ Galooli gule Xtios rexpejn Israel retoxtadgoldoonu. Luxh che guläjzreni naciön Egipto, bidalduxh retoxtadgoldoonu. Gucnäjdexh Diosreni bejnni remilagw, te guläänireni guedx Egipto.

¹⁸ Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni.

¹⁹ Guyu' gajtz naciön guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu.

²⁰ Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz.

²¹ Dxejcti gunab rexpejn Israel te rei lo Dios te gunibee reiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz.

²² Che badzucaj Dios Saúl, badeedni gunibee toreii David. Rájp Dios: “Agucbeä David xi'n Isaí rujn tejsi xhigab con narä. Susoobni xtidxä sujnni guiralii ni rlazä gac.”

²³ Rájpza Pabl:

—Galooli bia'n diidx lo rexagdoo David guxhal Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnga, rudzucajni xtojlnu, ruslaani nuure lo dojl.

²⁴ Che gusloj cagulijdx Juan rebejn, baluiini nan-abpac gusiechljaz rexpejn Israel, tiobnisreni te jia xtojlni.

²⁵ Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rjntu xhigab nacä narä? Dina gacä Crist nani bia'n diidx guxhal Dios. Colhuii, detzä siääd tej ni saccduxhru loä; nicla gac surloä te cuää xcura'chni.”

²⁶ Räjpza Pabl:

—Rniä lojtu sa'ä, rexagdoo toAbram, näjza lo chutis ni rajn Dios, loonu baxhal Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl.

²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtza.

²⁸ Balijdxreni Pila't ju'tni Jesucrist, luxh xhet bejdini te guetni.

²⁹ Che bagujc guiraa ni caj lo guijtzcuent Jesucrist, gulätreni Jesucrist lo cruzj, bacua'tzrenini nen baa cuä' te guilaj.

³⁰ Dxejcti guläs Dios Jesucrist lo rebengut.

³¹ Balti huält baluiloj Jesucrist lo reexamigwni nani biädnajlni nez rexyuj Galilee, renani biädnajlzani nez guedx Jerusalén. Bahuilojreni

gubansac Jesucrist lo rebengut, te naj rusule'reni diidx xcuent Jesucrist.

³² 'Naj siopnānu xtidx Diosre lojtu te guibala-jztu. Agujc xchero bia'n Dios diidxre con retoxtad-goldoonu.

³³ Gulās Dios Jesucrist te huile' diidxga par nure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojþ rājþ Dios: “Luj najclu xi'nā. Nadxej guleālu te guinibeelu.”

³⁴ Rājþza Pabl:

—Dxejcru stee lajt caj xcuent ni gulās Diosni lo rebengut te nuncru guetni. Scree bacuaa te niguii, rājþ Dios: “Sunidxā recossa'c lojlu si'c ni bia'nā diidx con toDavid.”

³⁵ Ni'cni bacuaaza toDavid nen stee Salmo ni gunii Dios, guniini: “Dipaclu gusaan gudx tiejxh Xi'nlu nani sanāljzlu.”

³⁶ Che gulujx gunibee toDavid lo retoxtad-goldoonu, si'cni badeed Dios gunni, dxejc gujtni. Biga'tznājni retoxtadgoldooni. Niluxh guyujdx tiejxh toDavid.

³⁷ Niluxh gulās Dios Jesucrist lo rebengut, ni'c di tiejxhni niujdx.

³⁸ Ni'cni colyacbee, la'tu resa'ä, Jesucristre, bejn ni caniä xcuentni, laani rudzucajni rextojlñu.

³⁹ Chutis ni rililajz xtidx Jesucrist ruslaa Jesucristni loj guiraa rextojlñi nani digacdi guibicaj mascä rusoobni guiralii ni caj lo leii xten toMoisés.

⁴⁰ Col̄susiñ te na'c sajctu recos ni caj lo guiitz ni bacuaa te niguii nani bacuaa xtidx Dios:

⁴¹ Col̄huilaa, la'tu ni ruxhiznāj xtidxä col̄guidxeloj, col̄nitloj, sa'csi naj ni nabajntu sunä te dzunro,

te milagwr nez lojtu, niluxh dipac lajztu chalii,
 mascä jiääd chu gusule'pacni lojtu.

⁴² Gulujxti xtidx Pabl, biunejz rebejn. Che bir-
 inäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre
 loonu.

⁴³ Che care'ch rebejn_{ga}, xhidajl rexpejn Israel,
 näjza xhidajl rebenzijt nani rusoob xtidx Dios
 si'c rujn rexpejn Israel, birinajlreni Pabl näjza
 Bernabé. Dxejc baliidxreni rebejn ni siädnejlreni,
 räjpreni lojreni chanuutis chalilajzreni didxlii
 xcuent Jesucrist.

⁴⁴ Che gojlti stee sabd, dxej ni rusilajz rexpejn
 Israel, xhidalduxh rebe_{nguejdx} bire' te gucuadia-
 jgreni guinii Pabl xtidx Dios.

⁴⁵ Che bahuii rexpejn Israel guiraa rebejn ni
 bire', bidxechlajzreni, gucnadareni. Dxejc gusloj
 cadxagdijl rexpejn Israel Pabl. Che rniini te diidx,
 laareni rniireni “didxxhiini”. Caniyajzareni Pabl
 näjza Bernabé, caguereni lojreni.

⁴⁶ Luxh di Pabl niclaza Bernabé nidxejb. Gusu-
 tijptisreni, räjpreni lo rebejn:

—Nungäjl ganid lojtu guiniinu xtidx Dios, sa'csi
 la'tu najctu rexpejn Israel. Niluxh ditu chalilajz
 xtidx Dios, lagajc la'tu caniitu digacdi guiba_{näjtu}
 Dios par tejpas. Ni'c sibiré loonu, te guiniinu xtidx
 Dios lo rebenzijt ni digac xpejn Israel.

⁴⁷ Sa'csi si'c agunibee Xtiosnu. Scree caj xtidx
 Dios lo guijtz:

Suxhalätu te guluiilu rextidxä lo rebenzijt ni digac
 xpejn Israel,

te chalilajz rebejn_{ga} xtidxä,

te laareni lo xtoj_{lreni}, cadrotis yu'reni lo guedxliuj,

räjp Dios.

⁴⁸ Che biejn diajg rebenzijt rediidxre, bibalazduhxreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najczeni.

⁴⁹ Bire'ch xtidx Dios guideb nez reguejdxga.

⁵⁰ Dxejc rexpejn Israel balijdx regunaa ni sajcro, näjza reniguii ni sajcro nen guedx Antioquía, te bidxehnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquía.

⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio.

⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxi xten Dios lastooreni.

14

Guyu' Pabl näj Bernabé guedx Iconio

¹ Che bidzujn Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzijt. Xhidajl rebejnnga huililajz xtidx Dios.

² Niluxh sgaii rexpejn Israel nani di chalilajz xtidx Jesucrist balijdx rebenzijt te bidxehnäjreni rebejn nani huililajz xtidx Jesucrist.

³ Ni'cni bia'n Pabl näjza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäj Diosreni.

⁴ Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl nájza Bernabé,

⁵ dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, nájza benzijt, nájza reguxhtis, rlajzreni nidxagdijlreni reapost, rlajzzareni nucuaareni guij yejc Pabl nájza Bernabé.

⁶ Dxejc gucbeereni xhi rlajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Listra, guedx Derbe, nájza reguejdx ni re' nejzga.

⁷ Che bidzujnreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni.

⁹ Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni.

¹⁰ Dxejcti dip gunii Pabl lojni, rájpní:

—¡Huisulii!

Dxejcti huisuyälíni, gusajni.

¹¹ Che bahuii rexpejn Licaonia xhi bejn Pabl, lagajc xtiidxreni guniireni, rájpreni lo sa'reni:

—¡Redios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni.

¹³ Dxejcti te bixhojz xten xquidoo Júpiter cua' tiop gon najl guii guejnreni. Biädnäni regonga ro' xquidoo Júpiter ni suga' ro' guejdxga. Rebejn nájza bixhojz rlajzreni nugu'treni regon te ganreni Bernabé nájza Pabl si'c rájpníreni rextiosreni.

14 Che biejn diajg reapost xhi cayajc, batiäjsreni tla' xhajbreni si'c te seen direni guichagljajz xhi cayujn rebejn̄ga. Ruxuñreni bidzujñreni lo rebejn̄, räjpreni lo rebejn̄:

15 —Colcuadiajg xtiidxnu. ¿Xhicuent cayujn guejbtu recosre? Ni lagajc sabejñtu najcnu, lagajc ben̄ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn̄, guzuxhijbtu lo Gueb Dios ni nabajñ par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, neñreni,

16 Galoo basaan Diosga gun reben̄ guedxliuj si'ctis ni rlanjreni.

17 Huen najc Dios, rudeedni nisguij, rudeedni rajc xhi rajw rebejn̄, rdxaj xque'reni, rbaa lajzreni. Ni'cni riembeepacnu yu' Dios.

18 Xhidajl diidx guniireni te chäii bejnreni gaan guredxi rebejn̄, sa'csi rlanjpac rebejn̄ nugu'treni regon.

19 Dxejcti bidzujñ gaii xpejn̄ Israel siädreni guedx Antioquía näjza guedx Iconio. Baquiilreni reben̄ Listra te gucuaaren̄i guij yejc Pabl. Bacuaaren̄i guij yejc Pabl, gudobxhajxhren̄ini guläären̄ini ro' guejdxga, sa'csi naaren̄i agujtni.

20 Dxejc lañ̄ ni suga' rexpejn̄ Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

21 Che bidzujñreni guejdxga, basule'reni rextidx Dios lo rebejn̄ga. Xhidajlreni huililajz xtidx Dios. Dxejc gubi'reni, biu'reni guedx Listra, näjza guedx Iconio, näjza guedx Antioquía.

22 Balijdxreni rebejn nani huililajz xtidx Dios, gucnäjäreni rebejnğa te batiplajz rebejnğa, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadre rnibee Dios.

23 Dxejcti gule reapost gaii dade' ni najc bengool te fiireni rexquidoo xpejn Jesucrist. Che gu-lujx bacua'nreni, lał ni guredx-gunabreni lo Dios, basadiidxreni rebejn, räjpreni: “Gacnäjä Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

24 Che gudejd Pabl näjza Bernabé distrit Pisidia, bidzujnreni estad Panfilia.

25 Basule'reni xtidx Dios lo reben Perge, dxejcti biriireni ro'c sääreni guedx Atalia.

26 Che bidzujnreni guejdxga, biu'reni neñ barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäjä Diosreni, baxhalreni Pabl näjza Bernabé chasule'reni xtidx Dios neñ guiraa reguejdx. Naj abaluux Pabl näjza Bernabé dzuunga.

27 Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, näjza xho badeed Dios huililajz rebenzijt nani digac rexpen Israel.

28 Xchej biannäjreni rexpejn Jesucrist ro'c.

15

Bidxagsa'zareni neñ guedx Jerusalén

¹ Nen redxejga bidzujn gaii dade' ni siääd nez Judea, caguluiireni rexpejn Jesucrist, räjpreni lojreni:

—Palga ditu gusal bee si'c gunibee toMoisés, di Dios guslaatu lo xtojltu.

² Che biejn diajg Pabl näjza Bernabé rediidxga, bidxagdijlreni redade'ga. Dxejc gule rexpejn Jesucrist Pabl näjza Bernabé näjza sgaii rexpejn Jesucrist chääreni guedx Jerusalén te guininäjreni reapost näjza rebeᅅgool te guidon xho gac xcuent beega.

³ Huisunejz rexpejn Jesucrist ni najc beᅅ Antioquía Pabl näjza rebejn ni sanäjreni, sääreni guedx Jerusalén. Gudejdreni reguedx Fenicia, näjza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebeᅅzijt xtidx Dios. Bibalazduhx rexpejn Jesucrist che biejn diajgreni rediidxga.

⁴ Che bidzujnreni guedx Jerusalén, huichagloj rexpejn Jesucristreni. Dxejcti bij Pabl näjza Bernabé diidx lo reapost, lo rebeᅅgool nani rnibee rexpejn Jesucrist, näjza lo rexpejn Jesucrist, guiraa redzunro nani cayunnäj Diosreni.

⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebeᅅzijt xtidx Dios, nanab churenii bee, nanabza gusoobreni leii xten to-Moisés.

⁶ Dxejcti bachagsa' reapost näjza rebeᅅgool nani rnibee rexpejn Jesucrist, te don xho gunreni.

⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzajt, te chalilajzreni xtidx Dios.

⁸ Luxh Dios, nani numbechee lastoo guiralii bejn, badeed seen huililajzpac rebenzajt xtiidxni. Badeed Dios Sprit Dxi xtenni lojreni si'c te seen te gachee bejn najczeni xpejni. Sigac baniidxni Sprit Dxi xtenni loonu galoo, si'cza badeednini lo rebenzajt.

⁹ Sigajc rinälajz Dios nuunu, sigajcza rinälajzni rebenzajt. Che huililajz rebenzajt xtiidxni, basia Dios lastooreni.

¹⁰ Naj ¿xhicuent rusieedu Dios, ä? Di niajcdi nisianäj retoxtadnu releiiga, digacdiza chosanäjnu releiiga naj. ¿Xhicuent rlanjtu chasanäj rebenzajt releiiga?

¹¹ Xhet si'cti gacni sa'csi Dios ruslaa nuure lo xtojnu che rililajznu xtidx Jesucrist, luxh si'cza ruslaani rebenzajt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgzeni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzajt.

¹³ Che gulujx gunii guiro'preni, xhet guniidi rebejn. Jacoobtis räjp lojreni:

—Sa'ä, colcuadiajg xtidxä.

¹⁴ Agunii Simón ni rniireni Pedr lojtu xho ganidoo baxhal Dios laani lo rebenzajt te gurejdx Dios rexpejni ni nadxaag lo rebenzajt.

¹⁵ Luxh si'cza caj lo guiitz. Agujc xcheroduxh bacuaa reniguii nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid.

Si'c gunä,

¹⁷ te jiadgajn rebejn narä te gacä Xtiosreni, näjza guiraa rebenzijt nani najc rexpenä jiadgajn narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacob lojreni:

—Dee najc xhigab ni runä. Na'cru gusieednu rebenzijt ni cagusiechlajzreni, renani salilajz xtidx Dios.

²⁰ Gucuaanu te guijtz, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn.

²¹ Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacob.

²² Che biejn diajg reapost näjza rebengool nani rnibee, näjza guiraa rexpejn Jesucrist xtidx Jacob, bichaglajzreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajcro loj rexpejn Jesucrist.

²³ Dxejcti bejnreni guijtz huinäreni. Bacuaareni rediidxre:

“Nuure reapost, näjza rebengool ni rnibee, näjza rexpejn xquidoo Jesucrist ruxhalnu xtixtios lojtu,

resa'nu nani rbäjz guedx Antioquía näjza estad Siria näjza estad Cilicia.

24 Rucuaanu guijtze sa'csi biejn diaagnu birii gatii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jiädniireni si'c.

25 Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näjza Pabl, nani sanälaaznu.

26 Agajc balti huält rlaizreni nugu'treni Bernabé näjza Pabl, luxh direni guidxejb gusule'reni xtidx Jesucrist.

27 Naj ruxhalnu Judas näjza Silas lojtu. Laareni susule'za guiraa rediidxre lojtu.

28 Tejsi najc xhigabnu con Sprit Dxaan xten Dios. Di rlaaznu gutaalrunu leii ni chasanäjtu. Releiiitis nani nanab rusoobnu rucuaanu lojtu.

29 Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtu nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios.”

30 Dxejcti basadiidx rexpejn Jesucrist Judas näjza Silas huinäreni Pabl näjza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtza lojreni.

31 Che biejn diajg rexpenzit Jesucrist diidx ni caj lo guijtza, bibalazduxhreni sa'csi gulecdxi diidxga lastooreni.

³² Dxejcti basule' Judas nājza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te baliidxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist.

³³ Ro'c bia'nreni xchej, dxejcru cuāj̄b rexpejn Jesucrist gubi'reni te gudeedreni xtixtios loj reni baxhalreni.

³⁴ Dxejc Silas bejn xhigab jia'nni ro'c.

³⁵ Luxh Pabl nājza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnājreni.

Huihuisac Pabl rexpejn Jesucrist neñ guiraa reguejdx

³⁶ Che gudejd xhidajl dxej, rāj̄p Pabl lo Bernabé: —Do'o guibi' lo guiraa reguejdx cadre basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlanj chanäreni Juan ni laa Marcw.

³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianāj Pabl nājza Bernabé.

³⁹ Dxejc gudildiidxreni. Gubicajtireni lo sa'reni. Ni'c sanā Bernabé Marcw, biu'reni neñ barcw, sääreni Chipre ni re' galäi nisdoo.

⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, rāj̄preni gacnāj Diosreni.

⁴¹ Lał̄ ni sasajreni gudejdreni guiraa reguedx Siria nājza guiraa reguedx Cilicia, ro'c gucnājreni guiraa rexpejn Jesucrist, basule'rurenı xtidx Jesucrist lojreni.

16

Huinä Timoteu Pabl näj Silas

¹ Bidzuṣac Pabl näjza Silas reguedx Derbe näjza Listra. Ro'c bidxaagreni te xpeṇ Jesucrist ni laa Timoteu. Xnanni najc beṇ Israel ni huililajz xtidx Jesucrist. Xtadni najc beṇ griegw.

² Didxsa'ctis rnii rexpeṇ Jesucrist ni yu' Listra näjza Iconio xcuent Timoteu.

³ Rlajz Pabl chanäni Timoteu. Dxejcti basäl Pabl bee Timoteu te gujcn̄i si'c xpeṇ Israel, te xhet naadi rexpejṇ Israel, sa'csi guiraareni nanchee xtad Timoteu najc beṇ griegw.

⁴ Che bidzujṇreni cade tej reguejdx, basule'reni xtidx reapost näjza rebengool nani rnibee xpeṇ Jesucrist guedx Jeurusalén, te gusoob rexpejṇ Jesucrist diidx ni bacuaareni lo guijtz.

⁵ Bazutijp xtidx Dios lastoo renani huililajz xtidx Jesucrist. Guixe-guixee xhidajlru bejṇ huililajz xtidx Dios xcuent Jesucrist.

Lo te bacal gunii te niguii lo Pabl

⁶ Che gudejdreni distrit Frigia, näjza estad Galacia, di Sprit Dxiān xten Dios nusaan nusule'reni xtidx Jesucrist neṇ reguedx Asia.

⁷ Bidzujṇtiren̄i gajxh estad Misia. Dxejc rlajzreni nijreni estad Bitinia, niluxh di Sprit Dxiān xten Dios nusaan nijreni ro'c.

⁸ Ni'c gudejdtiren̄i stelaad estad Misia, bidzujṇreni guedx Troas.

⁹ Te yääl si'c lo te bacal bahuui Pabl suga' te beṇ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjl̄u nuunu.

10 Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhaļ nuure te guluiini xtiidxni lo reben Macedonia. Narä, Lucas, ni cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

11 Biu'tinu nen barcw ro' guedx Troas. Bidzunnu Samotracia, te yuj ni re' nen nisdoo. Che bara yääl bidzunnu guedx Neápolis. Ro'c biriinu nen barcw,

12 bionnu guedx Filipos, guejdx nani sajcro lo estad Macedonia. Guedx romanni. Ro'c bia'nnu tiop choṅ dxej.

13 Che gojl sabd, dxej ni rusilajz rexpejṅ Israel, biriinu guejdxga bionnu ro' te gueuu, sa'csi biennu xhigab ro'c jlääd rexpejṅ Israel te guin-inäjreni Dios. Ro'c gurejnu, guniinu lo renane' nani bire' ro'c.

14 Lojreni nadxaag te nane' ni laa Lidia, te benzijt ni digac xpejṅ Israel. Guedx Tiatira siädni. Ruto'ni ladmuraad ni sacduxh. Rajṅ gunaaga Dios si'c rajṅ rexpejṅ Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni.

15 Birobnisni, näjza guiraa reni rbäjz rolijzni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolijzni.

16 Te dxej cheni sionnu cadro rinäj bejṅ Dios, bidxaagnu te dxa'p nani yu' te bendxab nen las-tooni. Rajp rexpaxhuaanni melduxh sa'csi rusule' dxa'pga recos ni gajd gac.

17 Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojnu —räjp dxape're.

18 Balti dxej birinajl dxape'ga nuure, entis canini rediidxga lo rebejn. Lacti basieed dxape'ga Pabl, ni'c gubiréni, räjpni lo beñdxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii beñdxab neñ lastoo dxape'ga.

19 Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhajxhrene guiro'preni nez roguui cadro suga' reguxhtis.

20 Che bidzuñnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni biejj lo guejdxre.

21 Caguluiireni garenca leii nani digacdi gu-soobnu sa'csi najcnu beñ roman.

22 Dxejcti bidxechnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäjlni baar guideb tiejxh guiro'preni.

23 Che gulujx gudinduxhrene Pabl näjza Silas, biäuren neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

24 Basäl guixhajgreni neñ latzguiib. Guyu' ni'reni neñ te baräjd ni sojb guued te di guxuñreni.

25 Garolyääl guninä j Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni.

26 Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni.

27 Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rla jzni nugu'tni lagajc laani, sa'csi naani abadxun reni niäu neñ latzguiib.

28 Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

29 Dxejc gunibee guixhajg biääd te bajl te biu'ni neñ latzguiib. Racsejsni biäädni bazuxhijbni nez loj Pabl näjza nez loj Silas.

30 Dxejcti gulää guixhajgreni neñ latzguiib. Gunabdiidxni räjpni lojreni:

—iColguinii, dade'! ¿Xhini'c nanab gunä te guslaa Dios narä lo dojl?

31 Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

32 Basule' Pabl näjza Silas rextidx Dios lojni näjza loj guiraa rebejn ni yu' rolijzni.

33 Lagajc dxejc, garol yääl, huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajg näjza guiraa reni yu' rolijzni.

34 Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni

yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaātu. Naj colchäj, gacnäjä Dios la'tu, saru chäätu.

³⁷ Niluxh räjp Pabl loj reguixhajg:

—Nuure najczanu beñ roman. Batiäjreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäureni nuure neñ latzguiib. Leii xten roman di gusaan gac rebeñ roman si'c. Luxh naj rlajzreni guslaareni nuure xhiga'tz. ¡Dinu guirii si'c! Lagajc laareni sujiädslääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas.

³⁹ Dxejcti biääd reguxhtis, gulääreni Pabl näjza Silas, gunabreni jäjllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neñ latzguiib, huijreni rolijz Lidia. Balijdxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

17

Cadxechduxh guiraa rebeñ Tesalónica

¹ Che gudejdreni reguedx Anfípolis, näjza guedx Apolonia, bidzujnreni guedx Tesalónica cadre yu' te xquidoo rexpejn Israel.

² Ro'c basule' Pabl xtidx Dios si'c ni rujnpacni. Choñ sabd, dxej ni rusilajz rexpejñ Israel, basule'ni xtidx Dios lojreni.

³ Basule' Pabl xtidx Dios ni caj lo guijtz ni bacuaa reniguii ni gunii xtidx Dios galooli. Caj lo guijtzga: “Nanab ted Crist trabajwduxh, guetni, niluxh sibañsacni lo rebeñgut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejñ Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani rajñ Dios näjza xhidajl reguna griegw ni sajcro huililajz xtiidxni.

⁵ Luxh yu' rexpejñ Israel ni di chalilajz, ni bidxechlajz. Batie'reni gaii beñploj, beñlatsiaj, bejnreni biejez nez galäii. Biu'reni rolijz Jasón caguiilreni Pabl näjza Silas te cuääreni guiro'preni nez lo rebejn.

⁶ Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujñreni laadxnu,

⁷ luxh badeed Jasón rolijzni jia'nreni. Direni gusoob leii xten César, najreni yu' stee rei ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'.

⁹ Cua' reguxhtis meel lo Jasón näjza lo reexamigwni. Räjp reguxhtis sudesacreni meelga che jii

Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

Che guyu' Pabl con Silas guedx Berea

¹⁰ Che biu' guxhijn, baxhalgajc rexpejn Jesucrist Pabl nájza Silas ste guejdx ni laa Berea. Che bidzujnreni guejdxga, biugajczeni xquidoo rexpejn Israel.

¹¹ Hueenru najc reben Berea loj reben Tesalónica, sa'csi rbaali lajzreni bacuadiajgzeni xtidx Pabl ni guniini xcuent Jesucrist. Guixeguixee bilreni guijtzcadro caj xtidx Dios te gucbeereni la gulii rextidx Pabl.

¹² Xhidajl rexpejn Israel nájza xhidajl ben griegw ni sajcro, gunaa sigajc niguii, huililajz xtidx Dios.

¹³ Che gucbee rexpejn Israel ni rbäjz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujnreni lo guejdxga bejnreni biejy ro'c.

¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas nájza Timoteu bia'n guedx Berea.

¹⁵ Dxejcti rebejn ni guzanäj Pabl huiänini guedx Atenas. Ro'c räjp Pabl lo rebejn ni biädnäni gudeedreni diidx lo Silas nájza Timoteu jädgajczeni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Lał ni guläjz Pabl guedx Atenas, guyuduxhni yärsia' sa'csi bahuini rajn guiraa rebejn rebanäjb nani runchee lagajc bejn.

¹⁷ Ni'c nen xquidooreni gudildiidx Pabl rexpejn Israel näjza rebenzijt ni rajn Dios si'c rajn rexpejn Israelni. Guixe-guixee gudildiidxni chutis bejn ni re' lo guii.

¹⁸ Dxejcti biääd gaii bejn lojni. Yu' reni rolduxh guijtz ni bacuaa epicúreos, yu'za renani rolduxh guijtz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zareni räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resureccion”, ni säloj yälgubansac lo rebengut.

¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacheenu xhi diidx ruluiilu,

²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacheenu xhi sälojreni —räjpreni.

²¹ Reben Atenas näjza rebenzijt ni yu' ro'c ru-teedreni redxej rniireni didxcoob lo sa'reni, o rucudiajgreni didxcoob. Ni'cpac rchaglazjreni.

²² Galäii Areópago huisulii Pabl, räjpni lojreni:

—Colcuadiajg guejbtu, bejn Atenas. Abahuiä xho randuxhtu xhidajl banäjb.

²³ Che siädsaä lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

24 Rāj̄p Pabl:

—Diosre benchee guedxliuj nājza guiralii ni yu' lo guedxliuj, sa'csi rnibeeni xhaguibaa nājza guedxliuj. Di Diosre cuāāz lo piāān niclaza nen reguidoo ni runchee bejn.

25 Diza Diosre guiquiin chu gacnāj̄ni sa'csi lagajc Diosre rudeed yālnabaj̄n, yālnadaan, nājza guiralii nani rquiin reben guedxliuj.

26 Rāj̄p Pabl:

—Guiralii reben guedxliuj najc rexagdoo tejsi gunaa nājza tejsi niguii. Desde galooli gunibee Diosga bal ijz chu renacion, nājza cati gunibee renacionga.

27 Benchee Dios guiraa reben guedxliuj te quiilreni Dios te chalilajzreni xtiidxni. Luxh suga' Dios gajxh cadetejnu,

28 sa'csi Dios rujn nabaj̄n̄nu lo guedxliuj, runiidxni rsiaan̄u lo guedxliuj, runiidxzani rdajlru xcālnabān̄nu lo guedxliuj. Laaca bacuaa rexpen̄najntu: “Najcnu xi'n Dios, sa'csi benchee Diosnu.”

29 Ni'cni, sa'csi najcnu xi'n Dios, di nungāj̄l jien̄nu xhigab najc Dios si'c rebanāj̄b ni nac-chee pla't, o guij, o yajg si'ctis ni runchee bejn rexpanāj̄btu.

30 Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechljajz guiraa rebejn,

31 sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensa'c. Rnilīi Jesucrist rediidx ni najc guliitis. Gulās Dios Jesucrist, baspaṅsacnini

lo rebengut, te gacheenu rajp Jesucrist yäl̄rnibee lo guiraa recos.

³² Che biejn diajg rebejn̄ga gubaṅsac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

³³ Dxejcti birii Pabl lojreni.

³⁴ Yu'za reni huinajl̄ni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn̄ ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto.

² Ro'c bidxaagni te dade' ni najc ben̄ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexpejn̄ Israel guedx Roma. Birinäj Aquila Priscila chääl̄ni. Biriireni Italia, biädreni guedx Corinto. Bihuii Pablreni,

³ sa'csi lagajc dzuun ni rujnreni rujnzani. Tejsi lajt guläjzreni te bejn̄ jion̄reni tejsi dzuun. Runcheereni yuguijd.

⁴ Gasob sabd, dxej ni rusilajz rexpejn̄ Israel, basule' Pabl xtidx Dios nen̄ xquidoo rexpejn̄ Israel. Rlajzni chalilajz rexpejn̄ Israel näjza ben̄ griegw ni digac xpejn̄ Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujn̄reni guedx Corinto, gusloj rusule'tis Pabl xtidx Dios guixe-guixee, guniliini lo rexpejn̄ Israel:

—Jesús najc Crist ni runloj rexpejntu guxhal Dios.

⁶ Dxejc bidxechnäj rexpejn Israelni, guniya-jzareni xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Räjpzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac bejn Israel gusule'ä xtidx Jesucrist —räjpni.

⁷ Dxejcti biriini lojreni, huijni rolijz Justo, te bejn ni rajn Dios si'c rajn rexpejn Israelni. Rolijzni sojb cuä' xquidoo rexpejn Israel.

⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolijzni. Xhidajlza bejn Corinto huililajz xtidx Jesucrist, dx-ejcti birobnsireni.

⁹ Gojl te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu,

¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn rexpejn Israel bidojpreni te g-naazreni Pabl. Sanäreni Pabl jusgaad cadro yu' Galíon.

¹³ Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

¹⁴ Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu.

¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶ Gunibee Galíon barilaagw resoldaad rexpejn Israel.

¹⁷ Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

Chon huält huihuii Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni nen barcw te siireni nez estad Siria. Dxejc ganid gudejdreni guedx Cencrea, cadreo bahuaj Pabl yejcní si'c te seen yu' xhi diidx bia'nni con Dios.

¹⁹ Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel.

²⁰ Dxejcti che gunabreni jia'n Pabl ro'c xchej, naaddini jia'nni.

²¹ Badeedni xtixtios, räjpni lojreni:

—Nungäjlpac chatedä laníro guedx Jerusalén. Siälsacä ree palga gusaan Dios jiälä.

Biusacni nen barcw, biriini guedx Éfeso.

²² Che bidzujnni guedx Cesarea, biriini nen barcw, huijni guedx Jerusalén. Che bidzujnni,

guniini xchan lo reapost nājza lo rexpejn Jesucrist. Dxejc huijni guedx Antioquía xten Siria.

²³ Che gudejd balti dxej, biriini guejdxga, gudejdni guideb estad Galacia nājza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

Baluu Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujn guedx Éfeso. Najcni xpejn Israel, gojni guedx Alejandría xten Egipto. Lacti rajc rnisa'cni, nanduxhzani xtidx Dios.

²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcäl nabajñni rinälajzni Dios. Niluxh xcuent Jesucrist najntisni yälrobnis xten Juan.

²⁶ Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila nājza Aquila xtiidxni, huinärenini rolijzreni. Ro'c basule'rureni xtidx Dios nani gajdni gan.

²⁷ Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guijtze lo rexpejn Jesucrist ni yu' neñ reguejdxga te gacnäjreni Apolos. Gucnäduhx Apolos rebejn nani badeed Dios huililajz xtidx Dios neñ reguejdxga,

²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhal Dios.”

19

Guyu' Pabl guedx Éfeso

¹ La_l ni guyu' Apolos guedx Corinto, huij Pabl xhidajl reguejdx ne_n región Asia, dxejcti bidzuj_nni guedx Éfeso cadro bidxaagni gaii bej_n nani huililajz xtidx Dios.

² Gunabdiidx Pabl lojreni:

—Che huililajztu xtidx Dios, ¿la biädlajz Sprit D_xan xten Dios ne_n lastootu, ä?

Räjpreni lojni:

—Nicla gajd diajgnu jiejn la yu' te Sprit D_xan xten Dios.

³ Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bej_n.

⁴ Dxejcti räjp Pabl lojreni:

—Guliica bastiobnis Juan che basiejch lajz rebej_n xtoj_lreni. Räjpza Juan lo rebej_n: “Co_lchalilajz xtidx bej_n ni siääd detzä.” Bej_n ni basä'tni najc Jesucrist —räjp Pabl.

⁵ Che biejn diajg_nreni rextidx Pabl birobnisreni te gachee rebej_n najc_nreni xpej_n Jesucrist.

⁶ Che batzuub Pabl _naani yej_creni, biu' Sprit D_xan xten Dios ne_n lastooreni. Dxejc gusloj caniireni garen-garen didxsaj. Guslojza caniireni didx ni badeed Dios lojreni.

⁷ Si'c tzubitio'p dade' gusajc si'c.

⁸ Si'c cho_n bäii, guixe-guixee gunii Pabl rextidx Dios, basule'ni xcuent xcä_lrnibee Dios loj rebej_n ne_n xquidoo rexpej_n Israel. Dini nidxejb guniini loj rebej_n.

⁹ Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejnni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni.

¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc rebejn griegw biejn diajgreni xtidx Dios.

¹¹ Gucnäj Dios Pabl bejnni xhidajl dzunro, remilagwr.

¹² Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebejdxab lastoo renani yu' bejdxab.

¹³ Dxejcti guyu' gaii bejn Israel nani entis rcansaj, direni cuääz tejsi guejdx. Najczeni bejn ni rbää bejdxab lastoo rebejn. Bejn redee xhigabcoob, naareni cuääreni bejdxab xcuent laj Jesucrist, ni'cni räjpreni lo renani yu' bejdxab nejn lastooni:

—Xcuent xcälrnibee Jesucrist nani ruluii Pabl rnibeenu guiriilu nejn lastoo bejnğa —räjpreni.

¹⁴ Guyu' gajdz xi'n Esceva, te bejn Israel, nani sajcro lo rebixhojz. Rujn redee dzuun rbääreni bejdxab nejn lastoo rebejn.

¹⁵ Che gunii rexi'n Esceva loj bejdxabga si'c, räjp bejdxab ni yu' nejn lastoo bejnğa lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbleä la'tu.

16 Dxejcti bixa't niguui nani yu' beṇdxab neṇ lastooni yejc rexi'n Esceva, gudinduxhnireni, basälta'nireni, batiäjsni xhajbreni. Dxejcti baxuṇreni biriireni neṇ yu'ga, bidxälguijdxzareni biräsya' xhajbreni.

17 Dxejcti guiraa rebeṇ Éfeso, rexpejṇ Israel sigajc beṇ griegw, gucbee xho bennäj beṇdxab reniguiiga. Bidxebduxh rebejṇga, luxh huä'p xpala'n Jesucrist.

18 Xhidalduxh reni huililajz xtidx Dios biäd lo rexpejṇ Jesucrist. Cacäjpreni guiraa recos xhet laadi nani rujnreni.

19 Xhidajl reni najc bidxaa biädnä reguijtz cadre caj yälṇajn xten rebidxaa. Dxejcti base'creni reguijtzga nez loj guiraa rebejṇ. Bejnreni cuent lacti meel sajc reguijtzga. Sajcreni tiubituu mil melpla't.

20 Xhidalduxh rebejṇ huililajz xtidx Dios. Batijp Dios lastoo rexpejṇni. Gulä'p guiraareni xpala'n Dios.

21 Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

22 Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxebduxh rebeṇ Éfeso

23 Neṇ redxejga, guyuduxh rebejṇ yärsia' sa'csi baluui Pabl xtidx Dios. Direni nichaglajz care'ch xtidx Dios.

24 Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c.

25 Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu.

26 Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con ñaa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni.

27 Ni'c ries nitloj xtzuunnu palga diru bejn sii ni'ch ni riencheenu. Luxh rieszä diru bejn jiädgajñ Diana neñ xquidoro Diana. Naj rebeñ Asia, näjza guiraa rebeñ guedxliuj randuxh Diana, banäjb ni saj cru, niluxh palga diru rebejn gan Diana, pet sinitlojni —räjpni.

28 Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios rebeñ Éfeso.

29 Guideb guejdx guyu' biejy. Dxejcti ruxunreni bidxagsa'reni lo yuj cadre rajc rexjuntreni. Gu-naazreni Gayo näjza Aristarco, beñ Macedonia ni rinajl Pabl.

30 Rlajz Pabl niu'ni cadre bidxagsa' rebejn, niluxh di rexpejn Jesucrist nusaanni.

31 Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäälu cadre nadxagsa' rebejnga —räjpreni.

³² Lo rebejn ni re'ga, yu' reni rbedxa' tej di-idx, sgaiireni rbedxa' garenca diidx. Te bieiduxh cayajc. Xhidalduxh rebejn̄ga nicla gan xhicuent bidxagsa'reni.

³³ Dxejcti gulää rexpejn̄ Israel te dade' ni laa Alejandro lo reben̄ xhidaalga, te guiniini lo rebejn̄. Dxejcti basääbni naani lo rebejn̄ te gac dxi rebejn̄. Rlajz Alejandro guiniini xcuent rexpejn̄ Israel loj guiraa rebejn̄, te di guidxe'chreni lo rexpejn̄ Israel.

³⁴ Niluxh che gucbee rebejn̄ najc Alejandro ben̄ Israel, tiop or̄ guredxaduxhreni, räjpreni:

—Sacduxh Diana xtios reben̄ Éfeso.

³⁵ Dxejcti biääd secretaar xten guejdxga lo rebejn̄, gunibeeni guc dxi rebejn̄, te räjpni lojreni:

—Colcuadiajg, la'tu ben̄ Éfeso, caguidxäj̄l te ben̄ guedxliuj ni di gacbee reben̄ guedx Éfeso rajnpac Diana, nani xhaguibaali bitejb lo guedxliuj.

³⁶ Sa'csi rediidxre najc gulii, nungäj̄l cuedxitu, na'c guntu recos guijdxre.

³⁷ ¿Xhicuent gunaaztu reniguii ni siädñätu ree? Direni gac gubaan ni rbajn̄ recos guidoo, dizareni niniyaj xtiosnu.

³⁸ Naj palga rlajz Demetrio näjza rebejn̄ ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

³⁹ Niluxh palga yu' xhi stee, nanab gac te junt xte reben̄guejdx si'c ni caj lo xleiinu.

⁴⁰ Ries jii xquejnu lo gubier, naareni bidojpn̄u te guidxagdil̄nu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia näjza Grecia

¹ Che bire'ch rebejn, gurejdx Pabl rexpejn Jesucrist biääd lojni, te baliidxnireni. Badeedni xtixtios lojreni. Sä'tini nez reguedx Macedonia.

² Guiraa reguejdxga cadre gudejdni, baliidxni rexpejn Jesucrist, basule'runi xtidx Dios lojreni. Dxejc sääni reguedx Grecia.

³ Che bidzujnni Grecia, bia'nni ro'c chon bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia.

⁴ Huinäni Sópater, xi'n Pirios, te beñ guedx Berea; näj Aristarco näjza Secondo, beñ guedx Tesalónica; näj Gayo, beñ guedx Derbe; näj Timoteu; näj Tíquico näjza Trófimo, beñ Asia.

⁵ Guiraa redee gunijd loonu, huiläjzreni nuure guedx Troas.

⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzunu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn̄pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli.

⁸ Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c.

⁹ Sobga' te bi'n ni laa Eutico ro' te bentaan. Laḷ ni cagusuleduxh Pabl xtidx Dios lo rebejn̄, gunaaz bacal bi'nga, gudiejsni, bitejbni lo yuj desde yu' ni riojn̄ pis. Che huiläsrenini, agujtni.

¹⁰ Dxejcti biäjt Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn̄pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni.

¹² Xhetliidiru rajcdi bi'nga nani gubañsac, nani guläs Pabl. Bibalazduxhrenei, huisa'nrenini rolijzni.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiini guejdxga, ro'cli jiu'ni neñ barcw.

¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzuñnu guedx Mitilene.

15 Nen̄ barcw biriinu ro'c. Che bara yääl, gudejdn̄u yuj ni re' lo nisdoo ni laa Quío. Che bara stee yääl, bidzun̄nu guedx Samos. Guedx Trogilio basilaaznu. Che bara stee yääl, bidzun̄nu guedx Mileto.

16 Di rlajz Pabl jiu'nu guedx Éfeso, diza rlajzni chunu Asía xchej, sa'csi riojb lajzni guidzun̄nu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn̄ Jesucrist ni yu' guedx Éfeso

17 Che guyu'nu guedx Mileto, baxhaļ Pabl diidx lo rexpejn̄ Jesucrist ni yu' guedx Éfeso, gurejdxni reni rnibee.

18 Che bidzujn̄reni lo guejdxga, räjp Pabl lojreni: —Lagajc la'tu najntu xho nabaṅä nez lojtu, dxejli ni bidzun̄ä, nabaṅnäă Dios.

19 La'tu najntu xho runä xtzuun Jesucrist guixeguixee, guideb xcäl̄nadipä. Dina niliä'p ä xpala'nä. Najntu xho ronä che di bejn̄ chalilajz xtidx Jesucrist. Che rlajz rexpejn̄ Israel nugu't narä, gudedä trabajwduxh.

20 La'tu najntu xho baluiä lojtu guiraliı rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtı huiluiä xtidx Dios lojtu.

21 Basule'ä xtidx Dios lo rexpejn̄ Israel näjza lo reben̄zıjt ni di gac xpejn̄ Israel. Röpä lojreni nanab gusiechlajzreni, gusa'nreni xtojln̄reni, nanab chalilajzreni xtidx Jesucrist te gudzucaj Dios xtojln̄reni.

22 Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxi xten Dios narä cha'ä guedx Jerusalén. Dina ganä xhi sacä ro'c.

23 Niluxh nanä cade tej reguejdx cadre rdedä rni Sprit Dxi xten Dios loä sidedä trabajwduxh, siäüä neñ latzguiib guedx Jerusalén.

24 Niluxh dina guidxebä, dizana chanälazduxhä xcälñabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlni palga chalilajzreni xtidx Dios xcuent Jesucrist —räjp Pabl.

25 Räjpzani:

—Naj agucbeä dirutu fisac loä, la'tu nani basule'ä xcälñabee Dios lojtu.

26 Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni.

27 Xhetliidi biäädxd di loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlajz Dios guibañnu.

28 Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxi xten Dios abaniidx dzuunga guntu, ni'cni abixe' xtiejn Jesucrist lo cruiz te gac gudzucaj Dios xtojlni.

29 Anancheä che rutdiru narä, siääd bejn nani rlajz chalilajztu ste'ca diidx, na'c chalilajztu niclaza jiuu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil.

30 Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te

chanajlreni redee ni rusguee.

³¹ Colhuidi te di gusgueereni la'tu. Di jiäl-lajztu chon ijz, dxej yääl basule'a xtidx Dios, ronäli balidxätu, sa'csi sanälazätu.

³² Räjpa Pabl:

—Asia'are, rusa'nätu ladzṇaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beṇsa'c, nani najc xpejṇni.

³³ Dina niniabä meel, niclaza xhabä che baluiä xtidx Jesucrist lojtu.

³⁴ Anajntu lagajc narä benä dzuun con ṇä te bio' xhi gudaunää reexamigwä.

³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejṇ quela xcaxlia'nu xhi cos” —räjpni.

³⁶ Che gulujx gunii Pabl rediidxga, bazuxhibnäjni rebejṇga, guredx-gunabni lo Dios.

³⁷ Dxejcti ronduxh guiraareni gudäazreni guejn Pabl, bachagro'renini.

³⁸ Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'ntinu rexpejṇ Jesucrist ro'c, biu'nu neṇ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzuṇnu lo xyuj Rodas ni tre'za lo nisdoo. Ro'c biriinu sionnu neṇ barcw nez guedx Pátara.

² Che bidzunnu ro' guejdxga, bidxälnu te barcw ni säa nez reguedx Fenicia. Dxejc biu'nu nen barcwga te chonnu ro'c.

³ Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunnu guedx Tiro cadro gule'creni cargw ni nuu barcwga.

⁴ Ro'c bidxälnu rexpejn Jesucrist. Biannänureni gajdz dxej. Baluii Sprit Dxi xten Diosreni te guniireni lo Pabl, räjpreni:

—Na'c chäälü guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhijbnu te guredxgunabnu lo Dios.

⁶ Che abazadiidxnu sa'nu, nuure biu'nu nen barcw, biädla laareni gubisacreni rolijzreni.

⁷ Biriitinu guedx Tiro. Che bidzunnu ro' guedx Tolemaida, gulujx xpiajnu biäjtü nen barcw. Dxejc biohuiinu rexpejn Jesucrist ni yu' guejdxga, biannänureni tejtis yääl.

⁸ Che bara yääl, biriinu guejdxga, sonnu guedx Cesarea. Che bidzunnu guejdxga, bionnu rolijz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolijzni huijia'nnu.

⁹ Yu' tajp xindxapxteb Felipe. Dios badeed diidx guiniireni lo bejn.

¹⁰ Xhidajl dxej guläjznu rolijz Felipe. Lał ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejn ni te guiniini xtidx Dios.

11 Che bidzuj_nni loonu, cua' Agabo xsindoor Pabl, baliibni lagajc reni'ni nájza reñaani, najni loonu:

—Anaj Sprit D_xan xten Dios: “Scree sulii_b rexpej_n Israel ni yu' gued_x Jerusalén niguii ni najc xteni sindoorre te guteedrenini ladz_naa rebenz_ijt.”

12 Che biejn diaag_nu rediid_xga, nuure nájza reben ro'c, gunabduxh_nu lo Pabl na'c chááni gued_x Jerusalén.

13 Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä ne_n latzguiib, xhet najcdi palga nungälä guetä gued_x Jerusalén xcuent Jesucrist —räjp Pabl.

14 Che naaddi Pabl gusiechlajz_ni, xhetru guniidinu lojni. Räjptisnu lojni:

—Sugac nani r_lajztis Dios.

15 Che gudejd redxejga, bilucheenu rehxix_tennu, biriinu guejdxga, sontinu gued_x Jerusalén.

16 Gaii rexpej_n Jesucrist ni najc be_n Cesarea huisa'n nuure gued_x Jerusalén. Ro'c huinäreni nuure rolijz te dade' ni laa Mnasón, be_n Chipre, yuj ni tre' lo nisdoo. Laani galooli huililajz_ni xtid_x Dios. Huijia'nnu rolijz_ni, ro'c gulääznu.

Huihuii Pabl Jacob

17 Che bidzun_nu gued_x Jerusalén, bibalazduxh rexpej_n Jesucrist sa'csi siopnu ro'c.

18 Che bara yääl huinänu Pabl lo Jacob nájza lo renani rnibee guidoo xten rexpej_n Jesucrist.

19 Dxejc gudääz Pablreni, bijni diid_x xcuent tebgaj redzuun nani badeed Dios bejni che

guyunäjni rebenzajt nani di gac xpejn Israel, te biejn diajgreni xtidx Dios.

²⁰ Che biejn diajgreni xtidx Pabl, gulä'preni xpala'n Dios, räjpzareni lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhreni leii xten toMoisés.

²¹ Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz nen reguejdx xten rebenzajt, ruli-jdxlureni na'c gusalreni bee rexi'nreni, na'cza chazanäjrureni rexcostumbrnu.

²² ¿Xhini'c jiennu? Siejn diajgreni abidzujnlu ree, dxejc suchagsa'reni te jiaädreni lojlu.

²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios.

²⁴ Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeereni laaca rusooblu xleii toMoisés.

²⁵ Biädla rebenzajt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjt nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen

xquidoo rexpejn Israel te huiye'tzreni lo bixhojz neñ guidoo xhi dxej jiädnä teygareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siäd Asia lo Pabl neñ guidoroga. Gunaazreni Pabl, dxejcti gusloj cayujnreni biejy,

²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nure! ¡Bahuilaaare! Niguiire najc nani rniyaj rexpejn Israel cadrotis rijni. Rulijdxni bejn te di chazanäjruren xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree beñ griegw, beñzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te beñzijt ni siäd guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

³⁰ Guideb guejdxga guyu' yärsia', bire' beñguixhuj, bixa'treni yejc Pabl, gunaazrenini, gudobxhaxhreni Pabl, gulägajcnenini neñ guidoroga. Biägajc repuertro xten guidoro.

³¹ Laļ ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaa capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl.

33 Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

34 Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni.

35 Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlajzreni nugu'treni Pabl.

36 Siädnajl guiraa rebejn Pabl, rbedxa'reni:

—Colgugu'tni.

37 Che agojl jiu' Pabl nen yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxsä!

38 An dilu gac niguii ni siäd nación Egipto, nani gudilnäj gubier, nani huinä lo reyubjdz tajp mil niguii nani rugu't bejn.

39 Dxejc räjp Pabl lojni:

—Narä nacä te bejn Israel, te bejn Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

40 Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu beṅgool, guejbtu resa'ä, näjza la'tu dade'. Gucuadiajgtu rextidxä —räjpn.

² Che biejn diajgreni caniini didx hebreo, dxidu-jru guzuj rebejn. Räjp Pabl lojreni:

³ —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten re-toxtadgoldoonu. Guideb xtipä basobä ni gunibee Dios. Gucä si'cpac ni najctu naj.

⁴ Dxejcti bidxechduxhä loj renani huililajz xtidx Jesucrist, bagu'täzareni. Balibä xhidajl bejn, niguii näjza gunaa, con cadenguib. Basäuäreni neṅ latzguiib.

⁵ Bixhojz ni sajcro näjza guiraa rebengool ni sajcro neṅ xquidootu, sajc guinii xhini'c benä. Laareni baniidxreni guijt loä. Ni'c huinää lo rex-pejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jädnääreni guedx Jerusalén te jäureni neṅ latzguiib, te gusacsireni rebejnṅa.

*Gunii Pabl xho huililajzni xtidx Jesucrist
(Hch. 9:1-19; 26:12-18)*

⁶ Räjnzani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga.

⁷ Biabrloä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpenä?” najni.

⁸ Dxejcti räpä lojni: “¿Chuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.”

⁹ Rebejn ni sanää bahuiloj bajlga, bidxejbreni, niluxh di diajgreni niejn xse' nani gunii loä.

¹⁰ Räpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.”

¹¹ Bastujxh bajlga loä, diru loä nien, ni'cni gu-naaz resa'ä ñää, sontinu guedx Damasco.

¹² Räj_p Pabl:

—Guejdxga guläjz te niguii ni laa Ananías. Ru-soobni guiraa releii xten toMoisés. Guiraa rexpejn Israel rnií nadalajz lo dade'ga. Biääd Ananías loä.

¹³ Cuä'ä guzujni najni loä: “¡Saulo, betzä, bahuisac!” Lagajc dxejc biajc loä, bahuiä lojni.

¹⁴ Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist.

¹⁵ Loj guiraa bejn susule'lu guiraa ni bahuiilu näjza nani biejn diajglu.

¹⁶ ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluiini xtidx Dios lo rebenzijt

¹⁷ Che gubi'ä guedx Jerusalén, biu'ä nen guidoro xten rexpejn Israel te guredx-gunabä lo Dios. Lal ni cabedx-canabä lo Dios, astoo gunixcalä,

18 dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.”

19 Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinuxhäreni, basäuäreni nen latzguiib.

20 Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban laḷ ni bacuaareni guij.”

21 Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzijt ni di gac xpejn Israel.”

Bia'n Pabl nen rolijzro xten resoldaad

22 Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Colḡu't niguiiga. Di nunyäjḷ guibajnruni.

23 Sanuutis cabedxa'reni. Gulääreni xcamangwreni, cacuaazareni yuyolḷ jiaa.

24 Dxejcti gunibee comandant lo resoldaad, räjpni:

—Colchanä Pabl nen yuro xtenu. Ro'c colḷquiin Pabl te guiniini didxgulii, te gacbeenu xhicuent rbedxaduxh rebejn lojni.

25 Sanätireni Pabl. Entis baliibreni ni', ḡaa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beḡ roman che gajdtu gacbee xhi dojlḷ bejnni, ä? Et si'cti caj lo xleiilu.

26 Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjl̥u dade're, sa'csi najcni beṅ roman.

²⁷ Biädguxuṅ comandant lo Pabl, räjpni:

—¿La gulii najclu beṅ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beṅ roman.

Dxejcti räjp Pabl lojni:

—Narä che goläli nacä beṅ roman.

²⁹ Che biejn diajg resoldaad nani niguijn Pabl si'c, baslagajcreni reduguijd ni naliib ni', ṅaani. Che biejnza diajg comandant najc Pabl beṅ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejṅ Israel

³⁰ Che bara yääl, rlajz comandant gacbeeni xhicuent rlajz rexpejṅ Israel ju't Pabl. Ni'c gunibeeni jääd rebixhojz ni sajcr̥u näjza reguxhtis xten guidoro. Dxejcti biädnäni Pabl, bazujnini nez loj guiraa rebejṅ ni bire' ro'c.

23

¹ Rdxelodzu'tz Pabl lo rebejṅ ni tre' ro'c laḷ ni räjpni lojreni:

—Narä gusule'ä tiop diidx lo guejbtu, beṅ Israel, sa'ä. Guideb ni nabanä ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni sajcr̥u, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, beṅgijdx. Ro'c sobga'lu te gunlu yälḡuxhtis si'cni caj lo leii. ¿Xhicuent rujnlu nani rnii leiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gacbee laa bixhojz ni sajcro xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcro, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtz ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beṅ saducee, yu'za reni najc beṅ farisee. Dxejc guredxa' Pabl räjpni lojreni:

—Sa'ä, narä nacä te beṅ farisee, xi'nza te beṅ farisee narä. Rililazä sibansac bejn lo rebengut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee.

⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga.

⁹ Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni:

—Di niguiire gac beṅgijdx. Palga gunii te angl xten Dios o te togool lojni, alga Dios tilnäjnu, dxejc sidxehnäj Diosnu.

¹⁰ Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni

yejcní. Dxejcti gunibeeni biäjť resoldaad cadro suga' Pabl. Guideb xtijpreni gulääreni Pabl galäii rebejnğa huinäsacrenini neņ yuro xtenreni.

¹¹ Che biu' guxhijņ, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidaunu nis che guigu'tlinu Pabl —räjpreni.

¹³ Si'cti tiuu niguii bia'n diidxğa.

¹⁴ Bidzujņreni lo rebixhojz näjza rebeņgool, räjpreni lojni:

—Abia'nnu diidx, xhet guidaudinu, xhetza guidaudinu palga dinu guigutxгаа Pabl —räjpreni—.

¹⁵ Naj la'tu näjza guiraa rebeņgool ni rnibee rexpejn Israel, colguxhal diidx lo comandant te guixee jiädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jiädnä comandant Pabl ree, nuure sugu'tnuni lo nezyuj che gajdni guidzujņ ree —räjp reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujņni, biu'ni räjpni lo Pabl rediidx ni biejn diajn.

¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpnı lo comandant:

—Pabl, nani niäu neñ yuro xten resoldaad, gunab loä jiadnälaä bi'nre lo guejblu te guiniini te diidx lo guejblu —räjpnı.

¹⁹ Dxejc gunaaz comandant naa bi'nre, huinäniini te laad cadre rut jiejni diajni xtiidxreni, dxejc räjpnı lojni:

—¿Xhini'c rıajzlu guiniilu loä?

²⁰ Dxejc bazejcnı diidx, räjpnı loj comandant:

—Abia'n te cuaa xpejn İrael diidx siniabreni lo guejblu jiadnä guejblu Pabl ro jusgaad guixee. Sınsireni si'c ni rıajz jiejnru diajgreni diidx xcuent Pabl.

²¹ Na'c chalilajz guejblu xtiidxreni. Tıu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxгаа Pabl. Naj cabäjztisreni guxhal guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sıi bi'nga rolizni, räpxgaani lojni:

—Rut lojdıpac gäblu guniilu diidxre loä.

Huij Pabl lo Pels ni najc gubernadoor

²³ Dxejctı gurejdx comandant tiop capitán, räjpnı lojreni:

—Colgutojp tiop gayuu soldaad, chää guedx Cesearea näjza gayonbitzıu soldaad ni bıjb cabaii, näjza tiop gayuu soldaad ni ca' spaad. Rcgaa guxhıjn guiriireni ree.

²⁴ Colquıil tiop cabaii cuıb Pabl te xhet gacdi Pabl cheni chanätıni lo gubernador Pels —räjpnı.

²⁵ Dxejcti bejn comandant te guijtз chanäreni lo gubernadoor.

²⁶ Loj guijtзga rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu.

²⁷ Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni bejn roman, guläänuni ro'c.

²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro.

²⁹ Dxejc gucbeä requej ni rbe'creni najc ganax xcuent leii xtenreni, niluxh xhet bejndini te nungäjl guetni, niclazä nanab jiäuni nejn latzguiib.

³⁰ Che baxhalreni diidx loä cabäzхiga'tz rexpejn Israelni te ju'treni dade're, baxhalga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guijtз ni bejn comandant.

³¹ Che biu' guxhijn, huixii resoldaad Pabl sanärenini guedx Antípatris si'cni gunibee comandant gunreni.

³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea.

³³ Che bidzujn redee Cesarea, badeedreni xquijtз comandant lo gubernadoor, huinäzarenini Pabl lojni te biembeenini.

³⁴ Che gulujx bilni guijtзga, gunabdiidxni lo Pabl:

—¿Caro siäädлу?

Che gucbeeni siääd Pabl Cilicia,

³⁵ räjpni lo Pabl:

—Guidzujnsi rexpejn Israel ni cadxechnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

¹ Gudejdti gaii dxej, dxejc bidzujñ Ananías, bixhojz ni saj cru, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor.

² Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtoste guejblu dxiduxh nabannu. Cayacnäduxh guejblu laadxnu con redzunsacduxh ni cayujñ guejblu.

³ Xquixtiosduxh guejblu, gubernadoor Pels, xcuent guiraa redzunsa'c ni rujñ guejblu guiranejz.

⁴ Luxh na'cru gusieednu guejblu, gucuadiaglaa guejblu tiop diidx.

⁵ Agucbeenu xho najc niguiire. Benguidxduxhni. Cadrotis rijni rujñni biey lo rexpejn Israel. Laani rnibee te cuaa ni laa nasareñ, nalajznu rebejn nani rililajz xtidx Jesucrist ni biääd guedx Nasare't.

⁶ Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu.

⁷ Niluxh bidzujñ comandant Lisias näjza resoldaad. Diptis badzucajreni niguiiga ladzñaanu.

⁸ Laani gunibeeni lo guejblu jiaäd reni rbe'c xquejni. Naj lagajc guejblu sajc guiniabdiidx lojni te gachee guejblu guli guiraa requej nani rbe'cnu xcuentni —räjp Tértulo.

⁹ Dxejcti guiraa rexpejn Israel ni suga' ro'c räjp guliica xtidx Tértulo.

¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —räjp Pabl—.

¹¹ Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx.

¹² Nicla tej dina nichagdilä bejn nen guidoro. Nicla tej dina niunä biey nen reguidobäz, nicla ro nezyuj.

¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni.

¹⁴ Rniliäpac lo guejblu: Rañä Xtios retoxtad-goldoonu. Jesucrist baluii xho gaṅsa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gaṅ bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios.

¹⁵ Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujn te dxej che guibaṅsac rebengut, rebenguidx sigajc rebensa'c.

¹⁶ Ni'cni racheä laaca nabañä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhi xcentä.

17 Räj̄p Pabl:

—Agujc xchej̄ yu'ä zijt, lajdx garenca bejn̄, naj̄ gubinää meel ni baxhal̄ reben̄ nejzga te gudedäni lo rebejn̄ ni xhet rajpdi. Biädñääza gojn̄ xtenä gudedäni lo Dios.

18 Ni'c sanää guidoro. Ro'c bidxäjl̄ rexpejn̄ Israel ni siääd Asia narä. Agucnayaä si'c ni rnibee xleinu. Xhet beñxhidajldi suganää, xhetza biejydi cayunä.

19 ¿Con rebejn̄ga naj̄? Te cue'creni quej lo guejblu palga yu' xhini'c rdxechñäjreni narä.

20 O guiniiza redee palga yu' xhini'c et laadi benä che suga'ä nez loj̄ junt xten guiraa rebixhojz ni rnibee najza rebeñgool lo guedx Jerusalén —räj̄p Pabl—.

21 Tejtis diidx̄ guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejn̄ lo rebeñgut, ni'c biädñätu narä lo rebejn̄re —si'c guniä lojreni.

22 Che biejn̄ diajg Pels xtidx̄ Pabl najza sa'csi naje'ni xcuent diidx̄ nani baluii Jesucrist, basoobni stee dxej̄ guidxagsac sa'reni räj̄pni lojreni:

—Che jiaädli comandant Lisias dxejc̄ gunä yälguxhtis —räj̄p Pels.

23 Dxejcti gule Pels te capitán ni rnibee te gayuu resoldaad ga'p Pabl. Niluxh räj̄pni lojni gusaanni gun Pabl nani rlaajtisni gunni. Na'cza gudxojn̄ni jiaäd rexamigwni te fiireni lojni.

24 Che gudejd̄ balti dxej̄, gubi' Pels, biädñäni chäälni Drusila. Drusila najc̄ beñ̄ Israel. Dxejc̄ gurejdx̄ Pels Pabl te gusule'ru Pabl xtidx̄ Jesucrist.

25 Gunii Pabl xho nanab guibañsa'c bejn̄ nez loj̄ Dios si'c ni gunibee Dios guibajn̄ bejn̄. Nanabza

gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fini xhi bejnreni. Raclesli Pels tant bidxejbni biejn diajgni diidxga. Räjpnı lo Pabl:

—Huij naj. Sıbedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini.

²⁷ Si'c gudejd tiop ijz. Dxejc birii Pels gubernador. Dxejcti biu' Porcio Festo, gujcnı gubernadorcoob. Niluxh Pels rlajz chanälajz rexpejn Israelni, ni'c basa'nni niäusıjc Pabl.

25

Gunii Pabl xtiidxnı lo Festo

¹ Che biu' Festo gujcnı gubernadorcoob xten reguejdxga, bia'nni guedx Cesarea chojn dxej. Dxejc biriini ro'c säanı guedx Jerusalén.

² Che bidzujnı guiejdxga, rebıxhojz nani rnıbee näjza renıguıı ni sajcru lo rexpejn Israel bıäd lo Festo. Gusloj cabe'creni xquej Pabl lojni. Gunabduxhırenı lo Festo

³ sa'csi rlajzırenı gunni te huen laareni, guıııbeeni jıädnäırenı Pabl guedx Jerusalén. Si'c gunabırenı, sa'csi abenxgaırenı xhıgab cuäzxhıga'tzırenı te ju'tırenı Pabl lo nezyuj.

⁴ Dxejcti räjp Festo lojırenı:

—Sunıäu Pabl guedx Cesarea. Di gaclaa guııı'ä guedx Cesarea.

⁵ Suchäı renıguıı ni sajcru lo sa'tu guedx Cesarea, te ro'c cue'creni xquej Pabl loä, don la yu' xhi dzungıııdx bejnı —räjpnı.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni.

⁷ Che bidzujñ Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlajzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjñ cue'creni xquejä lo guejblu, xhet guedx Jerusaléendi. Ananchee guejblu xhet latsiajdi benä lo rexpejn Israel.

¹¹ Palga nacä te benguijdx, o palga yu' xhi latsiaj benä te nungäjñ guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guteed narä ladzñaareni. Suchale'creni xquejä lo César nani najc reii xten reben roman —räjp Pabl.

¹² Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäälu loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujñ reii Agripa näjza chäälni Berenice guedx Cesarea. Biädhuiireni gubernadoor Festo.

¹⁴ Che guyu'reni ro'c xchej, bij Festo diidx lo Agripa xcuent Pabl. Räjñ Festo lojni:

—Ree niäusijc te niguii ni laa Pabl ni basa'n Pels.

¹⁵ Che guyu'ä guedx Jerusalén, rebixhojz ni rnibee näjza rebengool xten rexpejñ Israel gule'c xquejni loä. Rlajzreni guinibeä guetni.

¹⁶ Röpä lojreni: “Di leii xten nación roman gusaan guet te bejñ palga di bejñ jiädxgaa te guiniireni nez lojpacni xhi bejñ niguiiga, te guzejcza niguiiga diidx xcuent requej, te guiniini la guliireni.”

¹⁷ Ni'cni che biääd rexpejñ Israelga lo guejdxre, che bara yääl guregacä lo yagxhil xten gubernadoor. Dxejc guinibeä huixiireni Pabl guzuj nez loä.

¹⁸ Benä xhigab pet yu' xhi cosro bejnñi. Luxh che gusloj cabe'creni xquejni, guchegacä xhet latsiarodi bejñ Pabl.

¹⁹ Alga cadilñäjrenini xcuent xleiireni, xcostumbrreni. Guniizareni xcuent te niguii ni laa Jesuscrist. Agujtni, niluxh canii Pabl gubañsacni lo rebengut.

²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejñ Israel xquejni.

²¹ Dxejc che gunii Pabl lojpac reii César chale'c rexpejñ Israel xquejni, ni'c gunibeä jiäusijcni lañ ni gag guxhaläni lo César —räjñ Festo.

²² Dxejcti räjñ Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpn.

²³ Che bara yääl, biääd Agripa näjza Berenice, luxh sucheduxhreni. Näjza recapitán ni saj cru näjza rebejn ni saj cru lo guejdxga biu'reni neñ yuro xten Festo. Dxejc gunibee Festo biääd Pabl.

²⁴ Dxejcti räjp Festo lo guiraa reni re' neñ yuro:

—Reii Agripa näjza guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni.

²⁵ Niluxh narä rchaloä xhet bejndini te nungäjł guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni.

²⁶ Naj dina ganä xhini'c gucuaä lo guijtzt te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtzt ni chää lo César.

²⁷ Narä runä xhigab di nungäjł guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl ñaani, gusloj cagusule'ni diidx lojreni. Räjzni:

² —Reii Agripa, rbalazduxhä sa'csi sajc gusule'ä diidx lo guejblu, sa'csi ñaj suze'cä diidx xcuent guiraa requej ni gule'c rexpejn Israel.

³ Sa'csi guejblu nanduxh xcuent guiraa releii xten rexpejn Israel. Najza guejblu xhicuent rdx-agdijl sa'reni. Ni'c rniabduxhä na'c jieed guejblu gucuadiaglaa guejblu guiraa rextidä.

⁴ Räjzpa Pabl:

—Guiraa rexpejn Israel nañchee xho nacä che gucäli biuux guedx Jerusalén. Galooli najc guedx Jerusalén ladxä.

⁵ Galooliza numbeereni narä, malaii guicäjpreni gucä te farisee nani bazobduxhru xleinu si'cni rililajznu.

⁶ Ñaj suga'a ree, rlajzreni jläüä sa'csi rililazä diidx nani bia'n Dios con retoxtadgloodonu.

⁷ Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxej-yääl. Ñaj rniliä lo guejblu reii Agripa, sa'csi rililazä siliäs Dios guiraa rebengut te guibañsacreni, ni'cni rlajzreni gusäureni narä.

⁸ Palga abejn Dios xhigab guiliäsni guiraa rebengut te guibañsacreni, ¿xhicuent di lajztu chalii xtidx Dios?

⁹ Räjzpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni nen latzguiib.

¹⁰ Guiraa recosre benäza guedx Jerusalén. Baniidx rebixhojz ni rnibee guijt_z loä te basäuä rexpejn Jesucrist neñ latzguiib. Che biäureni neñ latzguiib, narä gule'cä xquejreni te gujtreni.

¹¹ Balti huält basacsiduxhäreni lagajc nen reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijz te ro'c huisacsíä rexpejn Jesucrist.

(Hch. 9:1-19; 22:6-16)

¹² Räj_pza Pabl:

—Ni'c sa'a nez guedx Damasco, ca'a guijt_z ni baniidx rebixhojz ni rnibee.

¹³ Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabi cadro suga'a näjza reni sanää.

¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuaní' yejc garu'ch.”

¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu.

¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu.

¹⁷ Naj suxhalälu loj rexpejn Israel näjza lo rebenzijt nani di gac xpejn Israel. Che gusacsí rexpejn Israel näjza rebenzijt luj, sacnäduxhälu, te di ju'treni luj.

18 Gacnäá lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Beñdxab ni rnibee rebeñdxab, sa'csi susoobreni xtidx Dios. Che chalilajzreni rextidxä, sudzucaj Dios xtojreni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä.”

19 Räjpa Pabl:

—Ni'cni rniliä lo guejblu, rei Agripa, cayunä si'cni naj Jesucrist loä gunä che baluiloj ni loä.

20 Gunixgää xtiidxni lo rebeñ Damasco. Röpä lojreni: “Colgusiechlajz, colgusoob xtidx Dios. Colyujn dzunsa'c te gacbee rebejn abasiechlajztu, arusoobtu xtidx Dios.” Si'cza guniä lo rebeñ Jerusalén, näjza lo rebejn ni yu' reguedx Judea, näjza lo rebeñzijt ni di gac xpejn Israel.

21 Sa'csi benä si'c, gunaaz rexpejn Israel narä neñ guidoro, rlajzreni nugu'treni narä.

22 Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guiitz nani bacuaa toMoisés näjza guiraa reniguüi nani gunii xtidx Dios. Laareni galooli guniireni xcuent xhini'c gac naj.

23 Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo rebeñgut, ganiddooza laani suluiini loj rexpejn Israel näjza loj guiraa rebeñzijt guliipac xtidx Dios, sibañsac bejn lo rebeñgut, si'c ni guniini galooli.

Di Agripa nililajz xtidx Jesucrist

24 Laḷ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

25 Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä.

26 Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni guli guiraa ni gujc, sa'csi xhet xhiga'tzdi gujcreni.

27 Guejblu reii Agripa, çla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

28 Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

29 Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

30 Dxejcti huisu Agripa, Festo, Berenice, näjza rebejn ni sobganäjreni.

31 Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiäuni.

32 Dxejcti räjp Agripa lo Festo:

—Paru dini niniab chääni lo César, sajc nuslaanuni.

27

Birii Pabl sää nez guedx Roma

¹ Basoobtireni dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto.

² Näjza te dade' ni laa Aristarco guzaj, siädni guedx Tesalónica xten Macedonia. Biu'nu neñ barcw ro' guedx Cesarea. Barcwga siäd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia.

³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl reexamigwni ni yu' guejdxga te bahuiireni Pabl, badeedreni xhi rquiinni.

⁴ Che säšac barcw lo nisdoo, bideednu stelaad Chipre, yuj ni tre' lo nisdoo, sa'csi säáb te beduxh, ni'c naga' Chipre xladbäjgwnu, te guxiiru rda' bej loonu.

⁵ Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzuñnu ro' guedx Mira xten Licia.

⁶ Ro'c bidxäjł capitán xten resoldaad stee barcw ni siäd guedx Alejandría. Agojł chää barcwga Italia. Bateedtini guiraanu lo barcwga.

⁷ Balti dxej chäigaj sonnu lo nisdoo. Trabajwduxh bidzuñnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c traba-jwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón.

⁸ Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzuñnu te lajt ro'

nisdoo ni laa Buenos Puertos cadre guxii sääb bej. Gajxh ro'c tre' guedx Lasea.

⁹ Agujc balti dxej cayaclaanu, luxh agudejdza dxej ni rucua'n rexpejn Israel, guxii riäädx chaa ijz. Rebäire di bejn cháä neñ barcw sa'csi yuduxh riesgw lo nisdoo, ni'c baliidx Pabl rebejn,

¹⁰ räjpni lojreni:

—Rexamigwä, runxgää bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw.

¹² Luxh sa'csi lajtga dini gajc huen tedreni rebäii nałduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta.

¹⁴ Niluxh di niaclaa gusloj te nisguipeduxh birii nez redajn xten Creta.

¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni.

¹⁶ Siädgobiuj barcw te canuu. Che bidzunnu ste-laad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw.

¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu

xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlajzni.

¹⁸ Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw.

¹⁹ Ni riojn dxej, lagajc laareni basälreni lo nisdoo guiraa xtrast barcw.

²⁰ Che agujc balti dxej niäu lo gubijdx, diza rebale' nieñ xhaguibaa sa'csi laltis cayajb nisguipeduxhga, biennu xhigab guiraanu sejtñu.

²¹ Xchero rut rlajzdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre.

²² Niluxh colcuedcxi lastootu. Niclatej bejn ni siääd lo barcw di guet. Barcwtis sinitloj.

²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä,

²⁴ najni loä: “Na'c guidxejblu Pabl. Nanabpac chäällo lo rei César. ¡Bahuilaa! Abasalajz Dioslu reni siädñälu; nicla tej reni yu' neñ barcwre di guet”, najni loä.

²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä.

²⁶ Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj,

²⁸ ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jiät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jiät si'cti galbigajdz metr.

²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlajzreni malaii jianijga lo guedxliuj.

³⁰ Dxejcti gulät remos canuu lo nisdoo cayu-jnsireni si'cni chastejbreni stee guench guiib lo nisdoo, niluxh rlajzreni guxuñreni guidon la sajc guidzujñreni ro' nisdoo.

³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajñtu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canu-uga.

³³ Che gusloj cayanij, gunibee Pabl, räjpni lo-jreni:

—Nadxej rajc tiop xman gajdtu gues, gajdzatu gau.

³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nit-loj.

35 Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini.

36 Dxejc bibaa-lajzreni, näjza laareni gusloj cayajwreni.

37 Nuunu najcnu tiop gayuu gayoñbitzubixho'p bejn ni yu' neñ barcwga.

38 Che agujc gudajwreni, basälreni triuu lo nisdoo te bicharu barcw.

39 Che bianisac, direni niembee yujga, niluxh bahuiireni cadro rdzujñ te gueubáz ro' nisdoo cadro yu' xhiroob yujxh ro' nisdoo. Rlajzreni nusu'reni barcw ro'c.

40 Dxejcti basläareni guidap guench guiib ni naaz barcw, bia'nreni guideb caden neñ nisdoo, baxheczareni yajg ni ruzaj barcw, guläszareni ladro nez delant barcw te balañaa bej barcw. Badzuréreni barcw sääreni nez ro' nisdoo.

41 Sas biu'reni te lajt cadro rdxagsa' tiop cuaa nis. Ro'c huilaj yejc barcw neñ yujxh neñ nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw.

42 Dxejcti rlajz resoldaad nugu't repres te di guixoobreni lo nis guxuñreni.

43 Niluxh di rlajz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujñreni lo yujxh.

44 Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujñ guiragajc rebejn lo yujxh ro' nisdoo. Nadaanreni bidzujñreni lo yujxhga.

28

Bidzujn Pabl lo yuj ni laa Malta ni re' lo nisdoo

¹ Che bidzujn_{nu} lo yuj ni tre' lo nisdoo, biem-beenu yujga najc ni laa Malta.

² Gucnäj rebejn ro'c nuure, gule'creni guiboo bahuiireni nuure sa'csi cayacnal_{du}xh, cayajbza nisguij.

³ Ca' Pabl te dääz yajg, sale'cnini lo guiboo, chela biriyäl te bäl nialajz neñ yajgga. Saa gudauya'ni ñaa Pabl.

⁴ Che bahuii reben Malta li najl bäl nialajzga cayauya' ñaa Pabl, gusloj cayäjbreni lo sa'reni:

—Pet rugu'tni bejn ni'c mase bejn_{ni} gaan lo nisdoo siguijxni xtoj_{ni}, sejt_{ni} ñaj.

⁵ Gubijb Pabl ñaani dxejcti bitejb bälga lo guiboo. Xhet gujcdi ñaa Pabl.

⁶ Dxejc reben ro'c cabäjz fiireni la sisiäguij ñaa Pabl o laa sejt_{ni}. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni choñ dxej. Huenduxh gujc dade'ga, baniidxni guiraa ni biquiinnu.

⁸ Naga' xtad Publio cayacxhuuni, yu'ni xliaa, cayajczani yobrejn. Huihui Pabl_{ni}. Guredxgunab Pabl lo Dios, dxejc batzuub Pabl ñaani yej_{ni}, basiacgajcni.

⁹ Che gucbee reben_{guejdx}ga abasiaj_{cni} ben racxhuuga, bidzun_{nä}jreni ben racxhuu lo Pabl, basiaj_c Pabl guiraareni.

¹⁰ Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu neñ barcw.

Bidzujñ Pabl guedx Roma

¹¹ Agujc choñ bäii yu'nu ro'c che biu'nu neñ te barcw ni siääd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus.

¹² Biriinu Malta sonnu neñ barcw nez guedx Siracusa. Ro'c bia'nnu choñ dxej.

¹³ Dxejcti biusacnu neñ barcw, sonnu lo nisdoo cheni bidzuñlinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzuñnu guedx Puteoli.

¹⁴ Ro'c bidxaagnu gaii xpejñ Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma.

¹⁵ Che gucbee rexpejñ Jesucrist ni yu' guedx Roma siopsaanu nez Roma, biäädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios.

¹⁶ Che biu'nu guedx Roma, bateed capitán repres ladzñaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluii Pabl xtidx Dios lo rebeñ Roma

17 Che gudejd choṇ dxej, gurejdx Pabl reni rnibee lo rexpejṇ Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejṇ Israel, dizana nibälazä xleii toMoisés. Niluxh bašäureni narä neṇ latzguiib guedx Jerusalén, dxejcti bateedreni narä ladzṇaa reroman.

18 Che biejn diajgreni xtidxä, rlanj reguxhtis roman nusḷaa narä sa'csi xhet benädi te nugu'treni narä.

19 Niluxh naaddi rexpejṇ Israel gusḷaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejṇ Israel cue'cä.

20 Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejṇ Israel sibansac rebeṇgut, ni'c nalibä cadenre.

21 Dxejcti räjpreni lojni:

—Nicla tej guitz gajd reguxhtis xten reguedx Judea guxhal loonu xcuentlu, gajdza rexpejṇnu ni bidzujṇ ree jiädsa'n diidx xhet laadi bejnlu.

22 Rlanjnu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

23 Guletireni te dxej guidxagsa'reni. Che bidzujṇ dxejga, bidxagsa' xhidalduxh bejṇ neṇ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con redidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz rebeṇ Israel jiäd.

²⁴ Yu' reni huililajz xtidx Pabl, yu'za reni di nililajz xtiidxni.

²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dyan xten Dios rediidxre guniini, räjpni lo rextad-goldoonu:

²⁶ Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejnre sa'csi di rlajzreni chalilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojreni.

²⁸ Räjp Pabl lojreni:

—Colgabee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucaj Dios xtojreni. Rniliápac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijl sa'reni laj ni sääreni.

³⁰ Tiop ijz guläjz Pabl guejdxga nen yu' ni cualaani. Biuni guiralii rebejn ni biääd rolijzni.

³¹ Lo guiraa rebejnnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

**Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

5cff1274-8dc3-5398-a94d-f6033bb363c9